

●社說

▲我國之學問觀

阮伯卓

據第一期論說所謂我民族現時之需要當以學問與經濟二者爲前提。則吾儕今日宜研究此二者之進境爲何若。茲請先言學問。幾年來茲學堂林立。凡各都市挾書投塾之士子。以千百計。從表面觀之。亦可謂學界發達之時代矣。然試從根本上商確。此可謂之進步乎。蓋亦令人不敢下一斷語矣。夫教育之階級有二。一則曰普通。二則曰實業。普通者所以開導人民之智識。實業者所以練成人民之職業也。今從普通教育之方面觀之。國家者。萃千百萬億兆無數之人以成之也。舉此千百萬億兆無數之人之各個智識能增進。則國家之資格方有與旺之機。故普通之學非僅在乎他日能備供職服役之一途。而實在乎養成各人人格爲至要耳。文明各國對於普通教育常發起其國民愛國之精神。知不污衊自己以爲他日受用之地步。此則普通學問之本領也。我國於普通學一途。政府爲我國民組織各級學校。始而幼學堂（即各鄉學總學）次而初等普通學。各省法越場（繼而高等普通學（中學）是則普通以下之教育。可謂條緒分明。規式完善矣。然國民智識尙未能十分發達者何也。是在乎吾人學問之觀念。不能善體政府立學之美意以實行之也。今之談學務者。每見民智之尙黑暗。則或唱爲更張之說。此實不通時之見耳。夫普通教育如此組織。無論何國政府。其布置法子亦同此一轍。惟其成功之遲速。則在乎國民觀感之意耳。今試思凡各士子入學於各級普通學堂之目的。是何所在乎。如上所言則自中學以下之普通教育。要以增進國民

智識爲主旨。然今之入學者。是在乎增進其智識。以養成自己之人格乎。抑在捨人格於不問。而只求供職服役之位置乎。夫既爲國民之一份子。則宜如何增進智識以爲完全之一民。此人生所以有普通學問之必要也。雖有性命。必計生活。求職業以謀生。亦生存之趨勢。然自己之智識既發達。則自己之生計。豈至陷於窮途。若徒以入學者原在乎供職服役之目的。則其入學之本領已先差錯。安望其有增進智識之一日哉。昔有好冶遊者。入場觀劇。及出。某友問以場中演何曲。冶遊者答曰。余之往劇場者。志豈在觀劇哉。將以目女子耳。故余未之知所演何劇曲也。夫某冶遊目有所蔽。無怪乎入場而不知劇曲。今日入普通學堂。而僅惟供職服役之是計。則雖政府設極良好之學堂。教師講極完備之教科書。想亦不能揭其所蔽而使之放眼以觀世也。故曰今日普通教育之途。不必務爲更張。只實踐施行政府所設立之階級。而最要者在求學之士子。須深曉普通學問之主旨。修進涵養。以達開智進化之途。不然亦蹈昔時專習科舉之覆轍耳。且又有一語以忠告於我少年學生曰。政府之用人有限。若人人而皆供職服役之是務。則安有舉國之人衆。盡充譯員書記之席。而曾不謀此等以外之事。禁乎。間嘗有人曰。今日學生數太多。恐吾子吾孫學成之後。難以謀自己之位置。噫。此亦由供職服役之見解。故有此等顧慮耳。試問歐美各國。通行普通教育之法。然則此各國之入學者。豈在皆謀譯員書記之地位乎。又試問苟無此譯員書記之地位。則吾人少年至寶貴之光陰。可以嬉以遊。而不曾讀書不登講席乎。由是觀之。則吾人今後求學之觀念。亦當刷新。反本以求其真正之進步也。

次言及寔業之學。夫國之所以強盛。人民之所以饒富者。以其國中多寔業之人材也。我國寔業學

之未講。夫人而知之矣。然當此競爭劇烈之世界。可不思鼓勵振作。以步武人後乎。試觀前月我全權大憲沙露公臨南定城對學生之演說。則知政府爲我民開寔業學。不久將有美滿之望矣。其演說有云。

(上略) 保護政府久已講求開化南人之法。現已廣設學校多所。且愈日愈行增設。將遍地而有。保護政府欲南人子弟無不受同一之教育。且欲其從事寔業教育。隨性所近。各有學堂。凡一切文明事業。歐人所做到者。南人皆能辨之。學生諸君。傾聽予言。曉然於予所現方籌擬以次舉行之各方法。使諸生他日養成高等實業人才云。昔時南人從學目的。專在做官。科目爲仕宦之坦途。此時南人唯以做官爲無上之榮譽。其他職業。則鄙視之。彼大農業家。大工藝家。大商業家。在社會上占有何等高貴之價值。曾無一知者。職是之故。聰明子弟。不肯從事於寔業。而南國富強之前途。尙瞠乎人後也。今則不然。人人皆知社會上之真價值。固不專屬於官籍之品銜。爲農爲工。皆足以建大事業。享大榮譽。而非必其皆身列官階也。且知現時之南國。苟欲其經濟之發達。富強之驟致。非國中青年俊秀。轉方針於寔業學問。不爲功也。卽如大法固以文明學術第一等國名於全球者也。然國人之傾向。常注重於寔業。予二年前。曾爲學部總長。斯言敢決其不謬。現下北圻人士。其抱一南國前途之希望者。亦已稍具此思想。凡遣子入學之家。趨向爲之一變。前者保護政府爲尊重南國禮俗起見。仍行科舉舊制。後正由南人請廢舊學。行新學。以法文研究格致諸科。今又請推廣寔業教育。予樂表同情。現與政界諸公。籌擬分設高等學堂。使國中人才得從事於有用之學。一如在法國各專門學堂焉。十年前全權浦公。以大政治家。來莅斯土。公又深愛南人。曾擬設各大學堂及高等普通學堂。是時南人進化程度尙淺。故施行未果。今而後辰

機已熟。十年前之阻力。可無礙於進行矣。保護政府已許南人子弟得與法人子弟受同一之教育。決不食言。此等大學堂何係有法越成終學卒業文憑者。或在奔嘒場卒業者。或在百工場卒業者。均準入學。或攷試其有入學資格者亦可。學成之後。或出而做官。或專門開辦寔業。咸適於應用。一爲法政高等學堂。練成他日完全之官吏。一爲師範高等學堂。練成他日完全之教師。又有各種寔業學校。類如河內醫業學校。成效卓著。當爲有目所共睹。此等學堂。另逐漸擴張。隨教員之多寡。與需要之緩急而定。此等教員。非惟政界中人。又須選兵學家。工藝家。商業家。之有專門文憑者方可。今雖未能一一開列。然予敢斷言曰。保護政府必先設各種寔業學校。練成南國諸大寔業家。今東洋經濟之前途。日臻盛利。如高等商業學堂。農業學堂。林業學堂。漁業學堂。航業學堂。又仿法國專門學堂。設一大學。分爲各科。如橋梁道路學科。開礦學科。度田學科。電學科。機器學科。博物學科。且設法教授可兼學數科以資寔用。凡在各大學堂卒業者。不惟一己之功名可躋顯達。而社會之利益。亦不少贊助云。(下略)

偉矣仁人之言乎。凡我國民。亦當自勉勵修進。以應政府作成之機會。近得官報所登載。政府已委醫業大學堂監督官骨岳 (Cognacq) 大人籌定各寔業學堂之組織規則。聞不久亦將次序成立矣。若然則我南各種之寔業。將繼此亦與已現成之醫業學陸路學。並進之於高等程度乎。然其他各學堂。則因我南昔時所未曾有。今一新創立。其爲功易。所謂白者易於施文采也。吾儕惟有靜候以觀其成效已耳。毋庸論及。今惟就法政高等學堂之設立。及仕宦候補各場所當停罷之原因。設一論題以說明之。使我民同知保護政府作成人才之至意。

法政高等學堂之前途

(卓續)

法政學一科。雖與各定業學科。同爲一專科之學。然法政學之影響於社會者甚大。何也。臨於民上。以保護人民。支配權利者。惟法政之學是賴。況今日之日。固由政治法律而立國之日也。國中官吏。精於政治之學。則民蒙其利。昧於政治之學。則民受其害。此文明各國所以有法政學堂之設。良有以也。我南舊辰。無法政專門之學。歷代之用人者。都由科目。或世蔭。或上官之荐舉而用之。然要之。亦皆以有學問之人物。充各官職。然古之所謂學問者。只在通經讀史一途。而經史中則全是述政治。上之經驗。及政治上之道德。此外別無他科學間雜乎其間。是則古昔雖無別設法政學科。但名之爲單簡之政治學可也。以古辰臨民行政之事。尙屬單簡。則以此單簡之政治學供應之。及其學優出仕。練習應用之事功。亦足以粉飾太平。贊襄治化。綽乎有餘裕矣。若辰至今日。國民之程度。非如昔比。法政之範圍。亦非如昔比。則其用官分職之途。亦須有寔踐有專科之人物而後可。且工業。醫業。農業。商業。猶必設專門學校以教之。况乎國中官吏。乃負有親民之責。其關係於社會者匪尠。而豈可以通常之學問。使之嘗試乎。自我南屬大法保護以來。百政逐漸改良。政治法律之程度。日高一。日。保護政府。知舊辰用人法之不足以應用於我南也。於是欲增進其科目。秀蔭者之資格。而設一學場。謂之候補場。北圻此場之立。始於一千八百九十七年。至一千九百十二年。則改爲仕宦場。而中圻則亦依北圻之規式。設一候補場於京師。此二學場可單簡而名之曰做官之學堂是也。當初政府何以設此做官之各學堂耶。無亦以爲當此青黃不接之辰代。欲用有新政治學問之人物以臨政。則國中新學之士。尙無幾人。欲用舊科舉學問之人物以臨政。則酬世之通才。又多缺點。

所以當時爲急於用人起見。不得不陶造舊人。使之略知行政之法式。及各科之概略。以爲臨辰應用。若至近日。則政治法律之改良。已漸至於高度。有治法者不可不有治人。况人民程度。方蒸蒸日上。則政府非惟當養才以擇官。而對於國民。尤不可不寔踐授之以政治學之知識。所以保護政府。已擬改候補與仕宦兩場。插入法政高等學堂。是蓋以文明之政治學。設專科以造就我國之人也。對於此改良一事。論者多紛紛以階級之高下。餉俸之多少致論。然觀全權大憲在南定演說。則知屬於官吏之俸餉。此後必有增加而無減。記者不敢以此一層再勞商確。何也。記者竊思。凡我熱心法政學之諸人物。當自知其對已義務。對國義務。以定求學目的。而非屑屑在於謀生問題也。惟吾儕請以今之候補仕宦。與將來之法政高等學比較觀之。吾人宜知候補與仕宦等場。特不過政府練習吾人作官之資格。故僅名之曰候補已耳。仕宦已耳。其他根本上之法政學。則政府尙有待於他日也。况法政學者。乃當使各辦公之科員。都具此等學識。豈有獨私於少數之官僚派者乎。欲當地方之官職者。必須經考試而後可。試如中國今日法政之人物。雖多。而欲做知事者。即我國之知縣必抵北京應知事之考。要而言之。則法政學乃陶養政治學識之專科已也。用人行政。則必以選考之途爲一定。若炤前此候補仕宦各場。只設場以練習少數做官之人物。是則其階級已超出於法政學堂之上。而其學問程度。則又僅一法政學堂之預科已耳。使其曰。此各學場已具有法政之高等學。然則豈有一國之中。僅於一年內擇幾許人。準之入學以行政。其他非有地方官之希望者。則可斥之爲政治學之門外漢乎。如曰爲其用各官職而設。則用官之途。須由考試。以驗其應變之才。通時之學。若只求之於講堂上之記憶力。竊恐亦未得其道也。

故今日法政學堂之設立。正政府所以爲吾民開一法政學之前途。而非僅區區爲用官而設也。况政府對於中北兩圻。方謀政治之同歸一軌。使兩處皆別設一場。以分教。如從前之仕宦候補。則成效無甚卓著。而場務之經費。教員之需人。徒見增損已耳。今日謀改良學務。縱無法政高等校舍之設。亦當合此二場爲一。以二場之經費。而合辦一完善之學校。一可以節省用度。二可以統一政見。未嘗無利益也。聞政府定罷候補仕宦。合中北南三圻。只設在河內法政高等學堂。三圻人共學一處。使政治法律學之程度。歸於一致。入學之資格。則或以普通法學之各人。或以舊時之舉秀開舉秀則又別以教之充入。學期則約在三年或四年之內。其學生之數。又不如前日之太於限制。學成卒業。則凡得法政高等學畢業文憑者。皆得充各行政衙門之參辦。或司法衙門之錄事等職。若夫欲出身做地方官職者。則須應京試。中選然後得補用。蓋政府意中以爲行政臨民之人物。必能洞悉乎國中原有之體制。之歷史。之風俗。之情勢。而後可。由京考試。卽所以證明夫此等人物之通才也。現聞政府擬於承天立一試場。以合試中北兩圻之人。此試場之目的。在乎考試通才。以補各府縣之缺。應試之資格。則須有法政高等學之畢業文憑。及留法學法政學之畢業文憑。方可入試。試期三年一選。其規式如舊時之會試。考官則又設一會同以充之。選取中格額。或五六十不等。試題又附有漢文。凡何人於法政學畢業後。欲應此試者。則必自家學習漢字。或準赴京投監學習。以預備應試。記者曾問政府某要人屬於此試場之期限。則某要人已示知曰。今年政府預擬於西歷十一月開辦此高等學堂。而改候補仕宦之舊學班。爲法政高等學的教育。則想於三年後。可以開第一次試期。由此取次考試。而此後中圻之各鄉試場。亦宜增高其程度。或停罷之亦未可知。某要人又曰。用人必經考試。此各國之通例。政府設此者。正以杜絕早歲臨政之害。大要二十五歲以上之人。出身入

仕。方有歷閱才幹。且現日安南法政官之通才。雖法字學是其至要。然尤當兼達漢文以考察從前治體。及需要於行政法事上者不少。故於學堂畢業之後。又定試法。以策勵各人之研究力。果爾則我南之法政學。今後其大放光明線乎。我南之地方官吏。今後其達於高等人物乎。觀此足知沙露全權大人之熱心開化。以輔贊我皇上刷新圖治之盛德大業。使我民進步階級。愈日以愈高。寄語凡有法政學之思想者。其當知所自勉。



特別記載

★ 請看沙露全權大臣之一篇大演說

一千九百十六年十二月二號。東洋全權大臣沙露大人在巴黎女學大學堂演說。中幾段歷舉越南舊時文明之優點。且極口稱譽南人。詞旨雄厚。感人心脾。展讀之下。春風風人。所謂有德者必有言也。爰亟譯之以公諸同人。一以知全權大臣之仁慈愛護我南人。一以知我祖尊固有文明之真價值。勿遽菲薄而吐棄之也。

沙露大臣首敘我南帝京陵寢風物。因慨嘆夫我南舊時之文明。其詞曰。欲解南人之心魂。欲知彼國人奉祀祖先習慣之一種遺傳的魔力。欲識破彼民族思想之高尙的尊旨。欲形容彼民族文明之榮譽的歷史。必時常徬徨游覽於古時帝王陵寢之地。如嘉隆明命紹治嗣德列帝遺陵云。聽者諸君。勿以古塚荒邱。作慘地愁天想也。葱鬱神皋。繁花密草之間。隱約有一種奇情。令人想見肅穆森嚴氣象。此種奇情。含有尊教的美術的感情。俯仰徘徊。不啻一幅莊嚴宮殿圖。引人入勝。

也。南國列代帝王。於其生時。已預擇一秀水奇山。景致清麗之區。爲千年宅。天然之勝境。補以奇巧之天工。古木參天。叢林翳日。池環瑤草。湖映蓮花。廟也。院也。像也。碑也。亭榭參差。樓臺隱約。古磁古銅。寶玩羅列。花鋼燦於玉石。香木潔於象牙。園圍其四周。岑寂而幽邃。尊嚴之地。平人不得冒入。其奉特別之恩命。得遊觀其間者。已有專人爲之引導。步履端審。默不敢出一聲。遊客心頭。彷彿有悠悠藹藹無限清微之琴音。從景物中流出者。試一仰首。輝煌金碧之靈牌。先帝音容。如在其左右。朝夕奉事。有情願守陵之舊時宮人。內監。在此常直。爲靈床之側。設有御服。及平時御用品。上供香花。卽逮事。先朝之臣妾。齋敬以將之者也。冒寂之中。時見人影。皆先帝生前之嬪御也。有白頭者。有花鬢者。日日拈香跪拜於御座之前。玉笏猶存。想見當時君臨九五之尊榮焉。國俗極重死者骸骨。先帝遭陵。防有姦人竊犯。故玉棺所在。秘不令人知之。五步一宮。十步一廟。波幻雲變。瑰閎萬狀。一以表帝室之威嚴。一以絕姦徒之覬伺。傳之千萬古。真神聖不可侵犯云。諸君試思。以一個大民族。既能創擬如此宏功。既能以美術的哲學的思想。點綴自己之榮譽的歷史。豈不足令吾人特別眷顧也乎。豈僅爲勞動場中奴隸之一用品也乎。彼民族之文明。原從中國孔教陶鑄得來。其文明之原點。以兩分子合成。一爲君權制度。一爲平等制度。吾人初至東洋時。未諳曉其人之性情風俗。及其遺傳習慣之一種大魔力。不知彼巖巖繼天立極之皇帝。雖操一切生殺予奪之柄。然君主而外。一般國人。無階級之別。有才學者。皆可置身顯達。參預國內政治之大權。滿朝朱紫。貴盡是讀書人。學問一途。爲凡百事業之關鎖。公卿士夫。必以此爲一定之梯階云。故南人有一事最可稱羨者。則全國人民。雖至於極微賤之農工。胼手胝足。以終歲者。苟其子弟從學。能拔取科第。則此出身卑賤之子弟。循序以至卿相。握重權。擁高位。從容坐論於御座之傍。不爲異也。且名公大人。啟

歷中外。曾居上書輔政之職。及其致事歸田。甫釋簪袍。卽開講帳。布衣草冠。與三五童冠相周旋。南人之重學問。一至於此。是非吾人所當讚美不置者乎。

全權大臣。於我國古時儒學上流人物。深加嘆賞如是。聞者誰不感動。大臣蓋瞭然於我國社會上及歷史上儒學派所占之地位。其所創立之宮殿陵寢。宏偉也如彼。其所培植之國魂。鞏固也如彼。儒學派亦何負於國民哉。我國固有之文明。其組織之而莊嚴之者。未始非此派之功業也。今日我國人。或淡焉若忘。置焉若棄。嗚呼。其亦覺醒於全權大臣喚夢之鐘聲也乎。

且我國民族之美點。非惟於上流人物見之。平民性質。亦多有足稱者。令我國進步之前途。尙有無窮之希望也。全權大臣又云。予與諸君談東洋。而於其最可寶貴之一優點。猶未敘及。此優點維何。安南人之特性是也。安南人勤敏而易化。心思巧慧。性行醇謹。極能諳熟而善於利用今日之各種機器。開戰以來。供給於母國之工人。殆以萬計。此項工人。或有專門學識。前經執役於柴棍水師製造局。及各工藝場學生。或係樸野之農夫。纔釋耰耨。便操機器。現執役於各水師廠。各礮藥廠。各飛機廠。均敏幹可嘉。爲吾法工藝家向來所未料有此者。將來東洋經濟之前途。端於此輩是賴。蓋以安南人固有之特性。日受吾法文化之灌輸。其成就當可觀也。夫如是。吾法既爲彼之恩主。且爲彼之良師。雖我人初至東洋時。於安南人性情風俗。未甚諳曉。舉動或多輕率。不無誤點。今而後當慎戒之。然以文明先進之大民族。任扶植弱小之責。陶造安南人以導之於進步之途。此名譽固非吾法人莫屬也。現下正須鼓一番大毅力。乃克闢東洋盛利之前途。南北圻二大平原外。尙須從事墾殖於廣漠之山林。二萬法里已成之陸路外。尙須增設五百餘法里已成之鐵路外。尙須延長三千法里已通行之航路外。尙須推廣。又須開各新工藝。立各新製造廠。變原料爲成質。以利用國

內豐饒之物產焉。母國將來經濟之前途。東洋必有一二分之担任。現時戰局。東洋之供給於母國者。若資財。若人工。若貨物。爲數不貲。其報効之誠。所求於母國者。亦惟一特別眷顧之感情。幸勿以畛域之私。視同化外。致有面隔情疎之嘆也。

噫。我可敬可愛之巴黎好婦女乎。幸聽予一言。彼千萬里外。嬌癡弱弟之安南婦女。尙其心藏之勿忘。彼雖情性狀貌。與吾種殊。然其對於英雄義俠之我大法母國。固具有一腔忠愛之熱誠也。

我全權大臣對於我東洋之評論。何等珍重。我同胞試傾耳諦聽斯言。苟吾國固有之文明。果如是其光明璀璨也。我民族之特性。果如是其優美也。全權大臣。果非爲過愛我南人。而贈以逾分之價值也。我同胞不當踊躍再四。致賀於我越南之新運命者乎。



文學

家族主義

雪輝

人不能以子身立於世界。俯仰六合。藐然七尺。無論政治尊教學問發明所恃以經營世界之偉業。固非一手一足之烈所能爲力。卽至於飲食日用之常。朝夕自保之策。患難之相捍衛。疾病之相扶持。胥有密切之關係。故好羣者人之性也。亦勢也。羣之起點。自家族始。人類之初。造端乎夫婦。由夫婦而父子。由父子而兄弟。由兄弟而親戚。成一家族。爲至小之團體。其後進而爲部落之團體。一國之團體。以及國際之團體。然於各團體中。有極懇摯之聯絡。極完備之組織。極鞏固之維持。則家族團體是已。故謂人類之結合。以家族始。仍以家族終。亦無不可。曠觀各國。自古迄今。莫不以「家族」主義爲人類之要素。然自科學發明。人類之思想。爲之一變。「自由」主義。「樂利」主義。顛倒吾人之神經。而同傾於「個人」之趨向。其結果也。古時一切制度。幾盡爲此急激之潮流。推翻其壁壘。「家族」制度。亦將爲其中淘汰之一物。雖然。「家族」主義。其忍受彼新潮流之淘汰也耶。又最密切也。地球未毀。太陽未黑。此最古之「家族」主義。其忍受彼新潮流之淘汰也耶。

漢利勃都 (Henry Bordaux) 先生著「小說題曰露綦偉羅 (Roquevillards) 家史。於此項問題。頗有研究之價值焉。先生亦法國著名文士。嘗從事著述。以維持風俗爲事。故其所著之書。皆倫理科中鉅作。詞深旨遠。娓娓動人。非一般尋常文墨。僅以豐麗見長。而於意義毫無取。如近時小說者比也。先生非惟倫理界之言論家。且爲倫理界之寔行家。嘗極力運動。以寔行其主義者也。慨現時「家族」主義之日就衰頹。思有以挽救之。乃唱立家族保存會 (Le Foyer) 設一會所。遍請國內名人。

茲會演說諸有關係社會之問題。家族保存會。於法國中等社會之教育。確有大功云。

先生所著之露綦偉羅家史小說。雖出版已久。然對於社會鍼砭。至今尚爲適時之藥。文略如下。

露綦偉羅家爲沙窩(Lavoie)一舊族。世掌兵刑職。以世家望聞於國。敘筆始於佛蘭梭露綦偉羅(Francois Roquevillards)。家長也。時年紀已六十。任三貝利(Chambery)地方審判廳律師。凡三十年。且於其別業經理家務。謀耕植之利。有子女五人。長男爲陸軍中尉。出戍屬地。次男初攷中律科進士。自巴黎回。習業於佛拉尼(France)律師家。三女。一與同郡人配。一爲教徒信女。執河內病院看護婦之役。一留侍。已與人訂婚。父母兄弟。濟濟彬彬。福祿雙全。身名俱泰。誠家庭樂事也。公性樸直。有古風。恪循高曾矩矱。夫人天性慈愛。事夫敬。撫子厚。兄弟姊妹。藹然友睦。一家之中。春風和氣。以爲平和之枕席。可長此以終古也。突如其來。良好之家庭。忽爲驚風急雨所傾倒。次男名末利士(Maurice)者。習業於佛拉尼律師家。荏苒半年矣。律師夫人。本多情種也。以其他緣故。與律師結婚。而愛情仍不屬。彼婦人不得於其夫者。固常好外遇。禮法所不恤也。花晨月夕。不久遂與末利士利聲氣相投。心緒纏繇。便成眷屬。露綦偉羅律師與其夫人。窺知危險事。爲愛子擔憂。欲防禁之。而水到渠成。機會已迫。舐犢之私。終喚奈何耳。適律師外出。夫人遂與末利士相携。往意大利。爲度蜜月之游。行時。夫人以十萬佛郎實旅橐。此十萬佛郎。本非夫人私蓄。夫人歸律師時。家貧乏資。無送嫁金。例不得正式行婚禮。(西俗女子出嫁。其家送粧奩。與其夫有相當之資產)然律師愛其色。不以此是故罷婚。西律。夫婦得以其所有之資產互相贈與。律師乃遣夫人以十萬佛郎爲送嫁金。令得正式行婚禮。據律。婦受其夫之贈與物。亦得有私產支付權。惟離婚時。須繳償如數。以故夫人常視此十萬佛郎爲己私蓄。有應享之權利云。行時取用。想不至生別項枝節。次日律師回。則婦與金俱

黃鶴去矣。妬極恨極。法權在手。思得一當以爲快。據律。婦竊夫物無干。可以洩憤者。惟奪婦之仇人耳。然誘淫人妻之罪。亦從末減。必以盜十萬佛郎之案。誣織成獄。既奪人婦。又盜人金。其罪乃重。遂決計以是陷末利士。告于審判廳。判官擬以苦監一年之罪。時末利士(Maurice)尙留意大利。而欠面之罪名已宣告矣。嗚呼。數百年世家望閥之羅綦偉羅族。遭此凶閔。將何以堪。以失身於一誨淫婦。受人中傷。祖尊名譽。一旦掃地。千載之下。又何以雪此污名也。無論如何。必須伸此冤屈。骨肉死生縈結不解之愛情絲。豈任彼誣讎之毒手一刀兩段也。經幾世基勤建篤赫赫在人耳目之豐功偉烈。安忍斷送於此飛來之橫禍也。桎梏之慘刑不足恤。而家聲之墜落深可憂。於是舉家奔走。盡瘁以圖拯脫。各犧牲自己。以贖全族之運命焉。其母素多病。得此驚耗。如霹靂當頭。憫愛子之罹刑。嘆家運之中落。萬縷幽愁。遂以憂死。其長兄方在屬地供兵役。請移換險遠地。冀早立功業。以蓋弟愆。不惜千金之身。孤注於嵐瘴之水土。不幸櫻病。死于非洲。其妹伏泣母床。情願不嫁。完貞白之名節。日夕祈禱。以報効祖尊之靈魂。其父則處變如常。志不少餒。默信祖功尊德。永世不滅。決先烈之弗墜。期誣獄之必伸。竭心力。罄家貲。與構陷者抗辨。爲其子明冤。後卒得直。盡毀前案。而露綦偉羅氏華胄之名。金甌無玷矣。末利士在意大利。聞母訃。別情婦而歸。賴其父之辨護。得免議。噫。此翩翩少年者。亦令族之一佳公子哉。鳳毛麟趾。信非虛也。彼歸國時。悉此案顛末。苟直辨其非。誘罪於佛拉尼夫人。則已之獄可立直。然彼情俠義氣人也。寧躬冒不韙。而不忍使淫盜之污名及其所愛。絕口不道意中人。并求辨護師。不提出佛拉尼夫人姓字。情俠乎。義氣乎。其子如此也。宜其父如此也。其母如此也。其兄如此也。其妹如此也。直心高誼。仁何等冤孽。皆足以湔雪之有餘。何況乎一情之爲累也。

文之結論。在父誠其子之數言。末利士甫出獄。往省母墳。其父誠之曰。吾兒乎。予今老矣。繼承之責在兒身上矣。子一息尙存。家長之權仍操之。予兒對於予。不可無服從之義務。噫。此地何地乎。鞠兒育兒之慈母。音容非彷彿其如昨乎。俯仰荒邱。予知兒對於死者之情。不能禁其勃發矣。夫人之所以爲人。惟恃此對於死者之情耳。故人類之生存。常以過去與未來之二者爲目的物。苟前無古人。後無來者。蠕蠕蠅蠅。度數十寒暑。饑而食。飽而嬉。與動物等。吾生毋乃太虛乎。方其縱欲而忘返也。甘以父母清白之體。爲情慾所驅。是卽兒對於死者之情。降至冰度時節也。人類高貴之價值。常以不得不有所服從爲其代物。或事天。或事其家。或事其國。或事其所尊信之理想。所嗜好之美術。而爲自己之奴隸者不與焉。今日兒服從於兒所敬愛之慈父。亦卽兒所納兒一生名譽之代價也。吾兒乎。君子小人之界。所爭只在幾微。等一用情耳。在英雄豪傑。則爲無上之事業。在亂臣賊子。則爲無上之罪惡。毫釐差而千里謬焉。故人不患乎多情。須知情何物也。卽希望也。卽吾心目中有一至高至貴之目的地。而汲汲以求達之是也。見義而勇爲。擇善而固執。夫孰非此希望之一念。有以驅策之者乎。所貴善於用情。不迷岐路耳。吾兒勉乎哉。將狎一情婦。必先念及兒之亡母。念及兒之賢姊妹。且念及兒他日膝下之女。當如何教育者。然則兒之用情。將於何擇。予之生兒也。兒兄也。兒姊也。兒妹也。予一生之幸福莫大於是。卽予一生之心力亦盡注乎是。予行就木矣。而今而後。兒乃失其護身之鐵盾。不得不出與世相見。家責將叢於兒之身。到此時節。兒方信予言之不謬。

文中末利士之誤於情。卽徇(個人)主義而捐棄(家族)主義者也。露綦偉羅律師誠子之言。卽實行(家族)主義而限制(個人)主義者也。噫。自(功利)主義盛行。一般社會。無不以人身爲世界之中心點。所謂(個人)主義者。行將震撼一切。深見遠識之士。對於社會之危態。常抱杞憂。欲保存舊粹。以

爲之抵制。弭人類之禍患於未形。然時至今日。古時制度。已多爲天演所淘汰。不適於生存之公例。哲理闡而專制息矣。科學明而尊教墜矣。惟家族制度。以天然之團結力。維持社會之秩序。欲保存舊粹。捨此將安從乎。苟能以（家族）主義爲前提。而思有以持續之。光大之。前思所以繼承。後思所以垂裕。藉天然之團結力。以深情大義相維繫。屹然立一社會秩序之干城。雖時勢轉移。千撞萬撼。而基礎既固。風雨不搖。（個人）主義之世界。當不至沉溺而不返也。彼大洋底之珊瑚島。於洪濤巨浪中。巍然獨存。豈有他哉。乃合無數之至小動物組織以成之也。吁。殆哉岌岌乎。（個人）主義之世界乎。家族者其卽人生苦海之一珊瑚島也耶。

一。辰。勸。人。以。口。百。世。勸。人。以。書。蓋。口。之。勸。人。有。盡。書。之。勸。人。無。盡。

士。大。夫。三。日。不。讀。書。對。人。則。言。語。無。味。照。鏡。亦。面。目。可。憎。

芝。蘭。生。於。深。林。不。以。無。人。而。不。芳。君。子。修。道。立。德。不。爲。貧。窮。而。敗。節。

貧。不。足。羞。可。羞。是。貧。而。無。志。賤。不。足。惡。可。惡。是。賤。而。無。能。老。不。足。歎。可。歎。是。老。而。虛。生。死。不。足。悲。可。悲。是。死。而。無。補。

善。居。功。者。讓。大。美。而。不。居。善。居。名。者。讓。大。名。而。不。受。

善。用。威。者。不。輕。怒。善。用。恩。者。不。妄。施。

● 科學

● 潛水艇

(續)

雪輝

乙 潛水艇之製造法及其効力

軍用潛艇之問題始於自動漁雷發明時代。千八百八十年間。歐洲各國製成一種新器械。曰自動漁雷。其戰鬪力極猛。能洞穿鐵艦。爆彈於艦之內部。雖極大之戰艦。極厚之鐵甲。可以擊沉之有餘。然其缺點在距離度極短。其効力僅在數百尺以內。若其射的距離太遠。則射不能及。卽及亦滅其効力云。初時欲利用此器械。製一極輕之艇。有逾常之速度。乘夜駛近敵艦。免爲所見。既放漁雷。卽便駛去。所稱漁雷艇者是也。然只可行於夜間。且多危險不便之處。苟海燈照見。卽爲敵艦擊沉。故必日夜俱可適行。無敵艦探見之危險。又能潛行敵艦下。於其要部直放漁雷。則漁雷之用乃神。可收絕大之効力焉。若此者捨潛艇末由。

適當其時。電池亦方始出現。其成效能貯電以備用。與貯油貯炭無異。而取用之法。且能使電不發熱力。不傳毒氣。有製造名家革蘭米(Granine)者。發明電力之機器。而此電力遂成爲一種自動力。能轉一圓柱。以使柱上之掉機焉。既有能使掉機之自動力。則潛艇之問題。思過半矣。所缺者入水時之排水力耳。千八百八十六年至千八百九十六年間。積十年製造諸家研究之精力。迨斯德所製之潛艇出現。而漸告成功。

夫以完全無罅之長壳。而下水能潛。則惟劃其中數區。爲蓄水地。排水力重。而艇自潛。外通一管。司

收水放水之用。入水時收之。上水時放之。艇既能潛。又須使之高低合度。常保均勢。而不至有傾仄之虞。製造諸家著力研究。乃製出一種櫓機。形如魚鱗。以電力轉振。水上船艦。則縱置其櫓機。而此則橫置之焉。此種櫓機。前曾用之於自動漁雷。蓋自動漁雷。亦一種之小潛艇。特無人行駛耳。然用之於潛艇。其大不等。則亦形種種困難。須有多數之魚鱗具。尋常亦須用三雙。兩頭兩雙。中間一雙。乃能使艇高低合度。不至傾仄。

潛艇之武裝。卽自動漁雷是也。蓋製造潛艇之目的。寔專在於利用此極猛之器械耳。放漁雷之法。或於艇中置一管。寔以空氣有極大之壓力。開放時其動力足以爆發漁雷焉。或於艇外置一彈力機焉。

且艇身完全無罅。則潛行水中。何由覓得去向。欲從艇中照見水面。而不爲在水面者所照見。乃置一管自內達外。高及水面。管中疊置三角鏡。令在外之光影。反照艇中。號(週視鏡)卽艇身之眼目也。苟爲所擊破。則成罄艇。飄流海中。不知所底。其危險爲何若耶。故各戰船航行海上。常細認水面。見有鏡管浮沒。力擊破之。然以茫茫之大海。一鏡管浮沒其間。何異水盆中一小針。且時常動蕩。立無定處。爲不可命中之射的。則擊破之殊非易事。

潛艇式之製造如是。可稱完備矣。雖不足以攻。亦足以守。然尙有不便者。艇中之電池。以鉛片浸硫酸水。雖易於成電。可卽時取用。然成物之電無幾。而原料之鉛硫酸。其重量已極大矣。卽如(斯德)號潛艇中所置之電池。幾占艇之全部。而應用之電。駛行極速。只得三點鐘。極遲亦不能滿一日。電池中之電取用盡時。又不得不向近處求電。而潛艇之作用。僅限於根據港之附近處。欲潛艇於攻勢。占有効力。必須擴張其駛行之範圍。令得於大洋外與目的物之敵艦相遇。法人羅貝夫與美人

荷蘭德同時創一新式。於用電力之動機。以轉掉機之圓柱外。增置汽力之動機焉。電力之動機。用於潛時。汽力之動機。用於航行水面時。以補電力所不足。羅貝夫則用一汽油。煮以石油。荷蘭德則用油精之自動力。油精較汽鍋爲輕。汽鍋則較油精爲穩。蓋油精善引火。常有焚艇之患云。然二者皆爲便利。自是而後。潛艇中所蓄燃料。足以駛行四五日之長途。而無缺。有行使之自由。不復隸屬於附近處之電廠。可以縱橫馳驟。得戰爭上之目的。物矣。蓋電力動機。可借用爲生電機器。又藉汽力動機。引電入電池中。以換用罄之舊電。電池之電。既有生電機器之電。以代之。則可減貯鉛硫酸之成電原料。令其稍輕。亦無妨害。此新式發明。法國及其他各國之潛艇。皆仿用之。

潛艇之進步。至此極矣。然就中而細別之。Lambert所製之潛艇。尚有一特別之優點。蓋凡潛艇之應用於軍事上之攻勢。其場合寥遠而寬濶。必具有海行之持久力。與可容多數人之體積量。如一戰艦資格。使船員得利用其寥遠而寬濶之場合。以盡其戰鬥力焉。初時所製潛艇。其出水也。不及體積百分之五。今所製式。能增至百分之三十。使艇身浮出水面。海行多得便宜。又能附設一壳於艇身外。爲貯水房。使壳內之艇身。仍成梭形。或成烟捲形。其受壓力。較他形爲最。外壳則與水上船艦形相等。貯水房既在外壳。艇之體積量。因之增廣。空氣乃足呼吸。卽所謂潛水艦式者是也。

潛水艦之名。今不常用。總名之曰潛艇。然潛水艦式。則誠現時所通用者也。製潛水艦之目的。在製成一種漁雷艇。具有海上戰船之資格。而又能潛行水中。免爲敵人所察覺也。（詳上潛艇與潛水艦注）千九百四年以來。法國及其他各國所製之潛艇。其大多數。皆此式也。方潛水艦式之初發明也。各國海軍界。於潛艇之出水力。紛紛聚訟。人持一說。日久經驗。確知潛艇必有極輕之出水力。乃能應用於軍事上之攻勢。屬於此方面。則今日各潛艇通用之式。無甚差別。於其他方面。關係軍

事上之資格。或潛行時。或航行水面時。其速度。其場合。亦大同小異。高下廣狹。大抵如出一軌。各國海軍界。以爲未足也。又互角心力。以求此項資格之增進。然苟不能增進其舊有之排水量。則亦無望其他之發達焉。欲潛艇事業之擴張。不得不將前式盡行改良。而別製一極大之新式。德國初時所製之挪日 (Narval) 號。排水量僅有一百五十噸。千九百一年所製之衣冽 (Aligrette) 號。至二百三十噸。千九百四年所製之癡尺 (Circe) 號。增至二百五十噸。千九百五年所製之逋倭于夷 (Pluviose) 號。增至四百噸。千九百七年阿癡迷 (Archimede) 號。增至六百噸。千九百十一年所製之 Grouta-vezede 號。增至八百噸。近聞有增至一千或千餘噸者。其他各國。亦逐漸擴張。今日一切事物。咸不能逃進化之公例。即潛艇與商船戰艦。亦同趨於此急激之潮流。而日進一日者也。匪唯軍事界。凡各國之政界學界經濟界。無不注意於海上器械之完全。其第一注意。則海船之速度是已。如初時 Laubent 所製之潛艇。每一點鐘航行水面得入海里。潛行得五海里。今日潛艇。航行水面得二十餘海里。潛行得近十五海里。夫以如此速度之極大潛艇。其製造之經費必愈宏。而利用亦必愈偉也。潛艇之武器。仍爲自動漁雷。其大者常設有六七隻。一遇敵船。便可臨時發射云。最新式之漁雷。其發射之速度。於七百至八百尺之距離。每一點鐘得三十五至四十海里。(數千尺之距離。則其速度大減。而其發射須用特別之取的法。) 現時命中之唯一方法。則就目的物之最近處發射而已。然此目的物爲駛行海上之船。而駛行之速度。過於放漁雷之潛艇。則能近之已難。且方其發射時。又須取必中之的。審視敵船之去向。算明其速度。以此等煩要之事。而立於潛艇中。僅憑一週視鏡。管爲指導。不戛戛乎其難哉。放一漁雷。而求其有命中之効力。非有精銳之眼光靈活之手腕不能。而其中固猶有天幸。從來漁雷之虛放也豈少哉。

德國欲用潛艇攻擊各國商船。恐漁雷之難以命中也。乃置大礮於所製之新式潛艇。潛艇本非以用大礮者。而突然有用大礮之潛艇出現。則誠今日戰局海上最新最奇之慘劇也。各國海軍界。大為震異。疑德人之用大礮。其目的在以潛艇攻潛艇云。英國亦仿用之。現時德國所製之新式潛艇。置七生的六之大礮一磅。上水時張出壳外。潛行時斂入壳內。又置三生的七之大礮二磅。常伸口向外焉。所置之礮。為數至微。而口徑又狹。對於放漁雷之潛艇。固乏戰鬪力。而對於無備之商船。則攻擊誠猛矣。此則德人所引為自足也。

丙 潛艇在現時各國之勢力

潛艇之機體與其作用。已如上所述矣。今且將潛艇在現時各國之勢力。一一調查而比較之。亦足以見其占世界上重要位置之一部份矣。

今日各國海軍。日孜孜焉於製造潛艇。欲知十餘年間潛艇進步之程度。可將千九百一十一年各國之潛艇數。與千九百一十四年之數。各列一表。而衡量之焉。

千九百一十一年各國之潛艇數如左

國名	艇數	已製	方製	總數
法國		六隻	八隻	一四隻
美國		一、	七、	八、
英國		○ 隻	六、	六、
意國		二、	○、	二、

此四國外其他各國未聞有一隻之潛艇者。至千九百二年。潛艇之數。法國猶稱第一。蓋是年又有方製之二十五隻。合前年之十四隻。共有三十九隻也。英國則是年共有九隻。美國則共有八隻而已耳。

夫當潛艇業方始發達之期。而法國已占優先力如此。想其於各國之潛艇界。能常執牛耳者矣。乃自時厥後。列彊咸肆力於潛艇業之競爭。而德國其尤著者也。德國初時。未有一隻之潛艇。奮力直追。如恐不逮。所製極多云。法國此時。反忽於潛艇之製造業。至千九百五十九百六年間。乃復增製。則已為潛艇盛行於各國之時期矣。且法國之潛艇業。發達最早。初時所製之式。數年之後。遂陳腐不適用。各國接踵而興。得較前精良之潛艇式。一一適用。須知古今凡百大業之創始家。其筆路籃縷。不憚嘗無限之艱苦。為後世樹前茅。而其結果令人坐享其成者。常獲事半功倍。冰生于水而寒于水。青出于藍而勝于藍。往往然也。

至千九百十四年。歐戰開幕之前數月。據英國海軍部統計各國潛艇之數如左。

國名	艇數	已製	方製	總數
英國 (Angleterre)	六九隻	二九隻	九八隻	
法國 (France)	五〇	二六	七六	
美國 (Etats-Unis)	二九	二五	五四	
俄國 (Russie)	二五	一八	四三	
德國 (Allemagne)	二四	一四	三八	
意國 (Italie)	一八	一一	二〇	

日本國	(Japon)	一、三、	二、	一五
奧國	(Autriche)	六、	五、	一一
丹麥國	(Danemark)	六、	四、	一〇
瑞典國	(Suede)	五、	三、	八
荷蘭國	(Hollande)	五、	三、	八
挪威國	(Norvege)	三、	二、	五
希臘國	(Grèce)	二、	二、	四
巴西國	(Brésil)	三、	〇	三
智利國	(Chili)	〇	二、	二
葡萄牙國	(Portugal)	一、	〇	一

觀上列二表。則此十三年間（千九百一年至千九百十四年）各國潛艇數之增加。亦可驚也。統計各國已製或方製之潛艇數。殆達四百隻。一等二等之海軍國皆有之。其有海軍而未製潛艇者。惟西班牙（Espagne）與亞爾因丁（Argentine）二國耳。夫以製造之費廉。戰鬥之力猛。或航行水面。或潛行。皆可適用之潛艇。無論何國。用之咸有大利。然從來各國海軍界。仍醉心於二三萬噸之戰艦。以為海戰之優勝權。只操於古代鯨鯢之手。而新產之小魚何與焉。甚至諛為大海之一塵云。今日戰局。寔為此種謬想之點眼藥。自開戰以還。除英德艦隊小鏖戰之數次外。縱橫於海戰之天地者。惟潛艇耳。潛艇於軍事上之關係。不其鉅歟。雖其力未必能代海戰之艦隊。然其方興未艾之勢。必釀成戰爭後海軍界之革命。而革命之結果。百年來大鐵艦所擁有之艦隊。無上帝權。必為之少殺。

今日諸小國。其國力不足製一無畏艦(Areadnoughts)或一超然無畏艦(Superdreadnoughts)(11111萬噸)者。必已曉然於潛艇爲己國之必要。蓋彼誠海軍守勢之絕良器械也。

第二等之海軍國。若荷蘭。若西班牙。若瑞典。若葡萄牙。若希臘。若土耳其。若魯瑪尼。若保加利及南美諸共和國。既不能撥六七十兆佛郎之經費。以製一大鐵艦。而惟製七千噸以下之小鐵艦。戰時亦不能與諸強國之艦隊。並馳騁於海中。則誠所謂糜有限之財。以填無窮之壑者耳。卽如荷蘭海軍。僅有四千五百噸以下之戰艦。一旦與日本開釁。安能與彼歌蘇夷(Katori)葛希麻(Kashima)等鐵艦相敵。馬來羣島之屬地。不立失於日人之手乎。一歌蘇夷艦。亦足以滅荷蘭軍艦之半矣。

千八百七年。英國一艦隊攻丹麥京都。滅丹麥軍艦。以報從拿破崙之仇。使今日而英丹復有戰事。則對於英國之艦隊。丹麥將何以禦之。現丹麥只有五千五百噸以下之戰艦七隻。艦上之武裝。總計只有十五大礮。而英國之海軍。則三萬噸以下之大鐵艦。能有五十隻。出其五六隻之力。已足滅丹麥之全數軍艦而有餘。然苟丹麥能有十餘隻之潛艇。十餘艘之潛水艦。以潛水艦扼海路之衝。邀截敵艦。而以潛艇防禦本國之海口。及海線。敵艦有竄入者。擊沉之。英國雖有百萬之海軍。恐亦不能越雷池一步也。以製造之費言之。則丹麥之七隻小鐵艦。已約值五十兆佛郎。而潛水艦十二隻。與潛艇十二隻。不過值二十兆佛郎。彼現時通用式之二萬三千噸大鐵艦一隻。值七十餘兆佛郎。以之製潛艇。殆不知其幾十隻也。孰利孰害。豈待辨而明耶。

未完

● 哲學



● 世界進步之問題

▲ 品的文明與量的文明之比例

原著

意大利歷史家飛雷羅 (Guglielmo Ferrero)

譯者

雪輝

世界今日果爲進步之世界也乎。驟思之。今日交通便捷。機器發達。此日新月異。瞬息千里之怪現象。一以汽力電力構成之。必直答曰。世界進步。然試一轉念。今日之風俗澆漓。人物低劣。昔時風雅高尚之性格。無幾存者。則又訝曰。世界退步。從前方面考斷。是量的文明之觀念。從後方面考斷。是品的文明之觀念。今日之世界。乃品的文明與量的文明之競爭場也。此競爭之結果。爲今日轟天動地之歐戰。

意大利著名歷史家飛雷羅氏著有歐戰論中一段。於二者之比例。論頗明晰。爰亟譯之。以餉我同人。之有心研究歐戰之遠因者。

且品的文明與量的文明之觀念。固非歐人所專有。我泰東諸國。亦已駸駸乎相率而入於此競爭初期之旋渦中。此困難問題。留心世故者。所早當解決也。

雪輝識

第一章

一 歐人向美洲游歷。坐汽車中。望其地如一大沙漠。於亞耳仁丁 (Argentine)。綠野青畦。極目千里。

時赴一停車場。後列三五房屋。牆塗以丹。上構層閣。乃記此大沙漠中有居民焉。於巴西(Brazil)羣山暗淡于日光照耀之中。一望無極。中有一二山色微明者。乃經火烈滿種咖啡樹之處。然亦並不一見人家房屋。車行每達幾時許。乃遇一鄉邑。於北美亦然。東部其尤著者。平原曠野。漸見村落。彼此相隔不甚遠。既而車行於一簇人家裏。房屋鱗比。煙突蔽天。崇樓傑閣。突起於低牆矮舍之間。沿途電車自動車。東馳而西驟。則一大都市也。一兩兆居民。鑿集於此。數千烟突外。環之以一大平原。蓋未幾車又駛行於滿目荒涼四無人煙之曠野矣。

歐人素以人滿聞於世界。凡海僻山陬可居之地。靡不有人家房屋。今游此地。望茫茫無際之曠土。誠目中所未經見者。不禁大爲詫異。然此荒山也。此曠野也。其中寔非棄地耕之闕之。瀦之築之。資本。不知其幾兆。佛郎。機器。不知其幾億。馬力。地力之產出額。若咖啡。若棉花。若粟麥。若煙葉。若羶毛。若食畜。若煤炭。若金銀銅鉄。年有增加。取不窮。而用不竭。如驟漲之水。排巨隄而溢乎四支。北美洲之諸省製造廠。又以其極巧捷之工藝。變原料爲成質。其多殆不可以數計。歐人屢屢於美洲之評品。或過加毀譽。然有一事。其實際誠超出乎歐人意想之外。則美洲之財產是已。自十九世紀之下半期。論財產進額之速且多。如北美之合衆國與南美之亞耳仁丁及巴西等國。殆無時無地能及之者。昔人讀傳奇小說。所談金花銀果之樂園。猶屬夢想。今則果於大西洋彼岸之一片土見之矣。我未來世紀之食料。服料。金銀油炭。爲奢侈社會所需用物者。皆將於是取給焉。誠一大樂土。化工巧爲造設。以解決我生生世世無窮困難無窮惶恐之生活問題。觀此則南北美洲。其山野。其都市。五十年來。所發生之大事業。與西半球上各國在吾人世紀中所占如何重要之位置。從可知矣。此日新月異。發達過度之美洲財產。不但於現時。人類生活幸福。開古今未有之奇歷史。而其効力。

自十九世紀以還。且影響於倫理界。政治界。吾人舊有之文明基礎。幾爲此澎漲極點之風潮所搖動。彼所發現之一最重大問題。往來於吾人思想界。常有羨美洲財產與惡美洲財產之兩般觀念。梗乎其間。舉現時社會所有諸困難問題。莫不以此問題爲其根源。欲解決而不可得。此問題者何。則世界進步之問題是也。予另於下章詳晰言之。

第一章

歐人論美洲人之財產。常含有一種嫉惡意思。視彼爲野蠻民族之財產。惟盡地力收貨寶是務。而於智識上之高尙事業。一切蔑棄。然寔非是。決不如是。諸君必聞有合衆國之各大學堂。宮牆壯麗。規制瑰閎。園也。院也。藏書樓也。博物館也。試驗室也。體操場也。學童游泳之溜池也。所受之課。古今東西各種音話。於文明進化程度。稍有影響之各種文字。各種歷史。純理。各科學。與應用各科學。凡世界所列爲教科者。靡不備之。維持此各大學堂之費。及教員薪俸。每年不知其幾十兆。而大都不得政府補助之一分文。僅取給於學生之學費。與富豪之好捐而已。猶太語。希臘語。拉丁語。數學。哲學之教員。以億萬計。而擲一分之血產。以還其薪俸者。乃卽都市之各大銀行。各大工廠。各大商店也。綜核學生繳納與富豪樂捐之金額。各大學堂用度。猶未達十成之七八。各都布各地方之博物館。藏書樓。男女學校。平民學校。實業教育學校。用以增進社會一般人之普通智識者。無處無之。皆大富人所創立也。實證既顯然如是。而猶冒昧曰。美洲人於金錢目的外。無思想無事業。不其誣耶。或又曰。美洲人不好美術。其都市視之。惡劣可笑。予謂美洲人之都市。以爲誠美矣。予固不敢如是。大胆。然謂彼不好美術。彼不肯用力以造成一美術國。則太甚。凡歐洲所有之建築術學校。法之巴

黎其尤者。中皆美國人之勤勵留學生。各都市。各地方。各銀行。各大學校。鐵路保險各公司所支出之建築費。殆不可以數計。謂其國無一偉大之建築物。無一建築術之著名家。則疇敢。歐人常稱美洲人喜買骨董。不論何物。甚至物之冒以骨董名者。亦不惜重價以購之。不知辨其妍醜其真假。然有曾與美洲富貴人家往來者。乃知在美洲人。亦如在他洲人。固有好奇者。有遭騙者。然其善相骨董精於選購者亦殆不少。

縱有一文家故爲僻論。力辨美洲人富於屬唯心主義之思想。爲歐洲人所遠不逮。則亦易甚。彼無論對於何等美術。何等理想。何等尊教。皆有自己感覺自己理會自己分曉之嗜好。其富於屬唯心主義之思想。卽此亦一爲僻論者所取證也。諸君試一游紐約(New-York)見都市中。凡世界之建築法。無一不具。書院也。備有一切人類之文籍。教堂也。備有一切人類之尊教。劇館也。備有各種音樂。環球諸國之粧飾品。人家房屋。陳設殆徧。卽此觀之。紐約都市不啻揭一招牌。欲取世界上所有一切之現象而調和之。雖其寔際尙屬曖昧。然此誠今日美洲人之特性也。其在哲學。則調和之現象發生一「業務的主義」之理說。人之言曰。美洲人「業務的主義」之理說。以凡理想之能應用於寔業者。爲正當理想。蓋以理想爲寔業奴隸。然乎否耶。予以爲凡經吸美洲空氣者。決不信此言。「業務的主義」乃一種調和世界上所有一切理想之理說也。此理說爲人設一活法門。令曉然於世界上無論何等理想。雖甲與乙立於消極反對之地位。然其効力皆能增進人類之智識之彊力之美利。又何事斤斤於甲與乙之優劣。無寧使人各自自由發達其所有之理想。以各收其理想之効力之爲愈也。凡曾受北美之社會習慣者。必不得以此主義爲適合於美人性質之理說。就哲學方面以觀察此主義。誠駁而不純。然純也駁也。亦足證明彼提倡此主義之民族。非尊寔事而薄理想。

者。至於無論何等理想。彼皆不敢輕蔑。

質而言之。在美洲人。亦如在他洲人。固有愚而多財者。然以金塗身之蠻漢。則誠古傳中之人物耳。此亦不足爲異。今日各社會之組織方法。令人無從夢見一冥蠢而豪富之民族。工也。商也。農也。皆須有專門智識。皆須有特別社會之完全資格。卽所謂專門科學與法律高等學是也。總觀之。則美洲人非於智識上之高尙事業。一切蔑棄者也。無寧曰。美洲人除一般少數。其他大抵視農工商等。寔業重於智識上之高尙事業。之爲確當而著明也。然在歐洲人。亦何莫不然。疇敢決然曰。今日舊世界之各國政府。及各上流社會。以文學美術理化學之進步。爲現時第一緊要問題。環予之身。所聞于耳者。則謀經濟器械之改良也。籌煤鑛鐵鑛之採掘也。講求機器之便利也。力爭商權之擴張也。各國君主公布於人民之第一條。卽以本國商業爲其最先注意。苟謂此項事業之經營。均屬於美洲人野蠻之性質。則當喟然長嘆曰。歐洲人同化於野蠻之速。有大足爲駭異者。然亦無怪其然也。歐洲人之踴躍奔走於經濟之旗下。不過爲歷史上之最大風潮所逼迫。誰寔爲之。則片帆冒險。越重洋。立足於茫茫荒島之新大陸之一意大利人也。(指哥倫布)風馳電掣。震撼一切。今殆沛乎莫之能禦矣。歐洲昔時。已有大文學大哲學大美術。已有極高之倫理。極良之法律。極善感人之宗教。然此時歐洲生計貧乏。產額不進。其人重禮法。尊上敬長。以道德法律風俗相維繫。限制個人之彊力。抑其驕矜之氣。使知人類爲一孱弱澆詐腐敗之動物。置身世界上。無異逆水行舟。稍一不慎。櫓篙無主。便飄流不知所底也。天幸歐洲人乃於大洋中覓得一新世界。昔時所崇拜盜天帝火之燧人皇。今乃知彼所盜者僅一綫之火。其術爲猶拙也。於是掘煤鑛焉。造電池焉。製出各種汽機焉。又能以自力增進天然之生產物。其進額之速。爲前世祖尊所未曾經見者。自此世人不復徒存福地之思想。且欲身履其中。舉一切舊時社會基礎而破壞之。凡法律風俗之可以制人彊力阻其

澎漲者。掃地以盡。無論經營何等事業。皆務其速求其多。既享人類之自由。且增人類之富力。而進步之理想誕生矣。此理想誕生時期。乃在十七世紀與十八世紀之中間。斯時世人始知有征服世界之能力。有享受地面寶藏之資格。至十九世紀。爲此理想發達時期。世人愈能擴張自己勢力於世界上。愈能增殖地面之生產力。愈能摧陷舊時禮法之牆壁。凡哲學家之辨論。尊教家之迷信。社會之文弱性質。守舊思想。與此理想立反對之旗幟者。無不望風而靡。辰至今日。此理想乃爲吾人世界之文明主動力。不寧唯是。彼乃不啻吾人世界之一專制大皇帝。壓我迫我。使我冒艱險躬勞苦。愈加勤勵而不敢辭。予不知此進步二字之名詞。有何神秘。而能具左右世界之魔力如是。然使有一人。讀此神祕名詞。日有百遍。今執而問之曰。進步何謂也。恐亦木然不知所答。其答之者。則人各一說。莫衷于是。試閱近時社會學各家之書籍之報章之議會編記。研究此問題者。其矇昧而自相牴牾者。比比然也。似乎因此問題未能解決之故。而進步理想之左右世界魔力乃愈猛。又一尤可異者。當此世界進步時代。而人人皆有江河日下之悲。工也。傭也。兵也。士也。爲子者。爲父者。爲母者。最甚則爲臣僕者。無一有古人價值。食之美味也。服之美飾也。快口之文詩。悅目之玩器。以及其他美藝美俗。日就淪亡。予不解吾人日言進步。而世界所有之一切事物俱趨於頹敗若是。則何以故。然則世界果進步乎。吾人以進步爲至高至貴之目的地。不惜忘寢廢食。犧牲性命以易之。然此果爲至高至貴之目的地耶。抑所謂至高至貴者。亦徒存諸空想耳。

第三章

世界進步之問題。爲現時社會最關重之根本問題。此不待言而決矣。吾人處今日之世界。欲鑒定

現時文明價值之良惡。蓋捨此問題未由。而此問題乃迄今未能解決。則何以故。世界之趨勢。不進則退。乃一以爲進。一以爲不進。如是其相反。則此困難之問題。終何從解決之。此絕對之問題。予於美洲所得之經歷。目所見。心所記。其現象乃如此也。意者予起程往美洲時。甫成所著之羅馬全史。予對於此新世界問題之研究方法。不以今日之歐洲爲比例。而以昔時歷史上之歐洲爲比例耶。庸或然也。然予竊想。苟以美洲今日各社會之現象。與予向來所研究歷史上之古代社會。一一比較。則於此曖昧之問題。亦微有一隙之明。果也。我現時文明鼻祖之古代文明。啻於一清貧者。其貪慾之量。進取之雄。冒險之質。創造之略。皆有所限制。生產力不進。需用物常形缺乏。而反以生財之事爲不得已。至於美術文學倫理尊教等之一切高尚事業。乃不惜殫精竭力。以求臻絕詣。試觀古時工藝。無不含有一種美術性質。各裝飾品。間有存者。皆傳爲絕大之偉業。以及修身學之純粹。禮儀之繁縟。形式之完備。可知古時品的之文明。優於量的之文明。而其受種種限制。爲吾人今日所萬不能堪者。卽以爲品的之文明之代價也。吾人今日。既取祖尊數千年之舊世界而破壞之。既以增殖生產爲最大之目的。既享有完全之自由權。古時限制之魔障力。幾無一存者。然職是之故。不得不將我祖尊所遺傳固有一切美術文學倫理尊教捐棄殆盡。亦不啻犧牲其品的之文明。以購量的之文明焉。試觀今日《古典學》之危機。始如一髮。古時人何以耽讀荷墨耳（Homer）西斯龍（Cicero）之書。蓋中有希臘拉丁文豪諸傑作。古時文章。所目爲絕品模範者。上流社會。尊崇布置。非僅視爲智識上之一玩物。此時文章勢力。能占有社會之極重價值。高名大位。皆由此途。曾幾何時。而此絕品模範之大文章。已全失。其舊時之價值矣。其故或因今人愛賞別種文體。或因近時社會交涉之事太繁。讀書作文。皆須出以簡捷之方法。反厭此絕品模範文體之煩。卽如美國之候選。

總統員。每日須讀數十篇演說。而欲一合體裁。如西斯龍 (Cicero) 景的連 (Quintilien) 諸大演說家之作。不戛戛乎其難哉。然至於不以古典學爲文章標準之時代。則文學之衰。可斷言矣。一人亦常言。今日美術之前途危矣。然美術之界有二。其一爲遊戲之美術。助人興趣。消遣時日。如音樂。演劇。文章。亦有其一小部份。其二爲粧飾世界之美術。如建築。雕刻。繪畫。與其他之粧飾品。雖一切美術。今日俱陷於危險之地位。而下項美術之危機爲更甚。自古及今。試問有甘擲無量無數之金錢。以粧飾世界。如今日者乎。問有糜費公帑。養建築。雕刻。繪畫之一大軍隊。其數之倍蓰。如今日者乎。問世界上之都市之樓臺之公園之橋梁之道路之廂舍。建築之多。有如今日者乎。乃吾人於現時創始工程。均不能躊躇滿志。則何也。彼美洲人費幾多之財產。以粧飾其都市。而終不能有一維尼 (Venise) 之聖馬耳克 (Saint-Marc) 教堂。與一巴黎之大教堂。則又何也。予前已言金錢也。工匠也。彼無一缺者。彼好尚美術之心亦極熱。然則彼之缺點。殆何物耶。有一焉。時間而已。一日予與紐約一建築著名家談。予羨美人之建築術。彼笑而答予曰。唯唯。否否。我同胞苟出百兆元以造一極壯麗之教堂。如聖馬耳克教堂。亦至所樂。然必以十八月之限。要予竣工。斯言誠深切有味。夫以朝更夕改。日新月異之世界。貪多務得。大而宮室。小而器用。莫不皆然。而欲以絕品模範之美術裝飾之。烏乎可。欲建築一絕品美麗之樓臺。製造一絕品良好之器皿。則須假以年月。寬其制限。其選材料也。須特別精細。其建築之製造之也。須出以持久不變之嗜好。寧有十八月最短之時間。而能造一極壯麗之教堂。如巴黎之大教堂也耶。使十八世紀法國之時尙。已喜新而好奇。服飾器用。無十年不變。如今日者。則巴黎之大教堂。亦不過意想中之一物焉耳。

未完

● 文苑

● 詩鐘

我 皇上昔在 潛邸。靜養讀書。及卽位來茲。非惟憂國憂民。勵精圖治。而於百幾之暇。常著
爲吟詠。以示臣工。宛有虞陞賡歌之韻事。茲期本雜誌敬登錄
皇上年南巡御製之各詩章如左。

御製駕幸廣南觀風得四絕十首

南塵喜見甫清平。更慮黔黎憾養生。萬里
自慚難洞見。鑾輿便勅啓南行。
粼粼象足石鋪頭。太古名傳福象山。俯瞰
海兒潭浪碧。輕輿忽已過重巒。
南來千里路漫漫。瞬息鑾輿經隘關。轉電
輪機旋海岸。宛然飛鳳遶雲山。
海雲南直一雄關。崇嶺崎嶇蜀道難。保禦
古今洵在德。秦隋非不仗金湯。
薄暮機鑾已抵沱。鄰臣慶祝禮情加。盛開
筵宴鋪燈彩。燦爛星陳做大羅。



會安庸店甚粘稠。比屋清商萬貨輸。羣迂鑾
輿迎拜慶。宛如夏日望陽蘇。
東郡驕陽怯損禾。鑾輿幸后雨滂沱。自顧寡
躬慚邈德。多蒙 仁愛沛 恩波。
會安車駕幸芄苗。處處歡迎奏護韶。愛戴堪
嘉黎庶念。惟嫌慨嘆未蘇樵。
芄苗自古野蠻州。法學文明占上頭。開礦設
機收麗水。無遺地利一緇銖。
鑾輿觀罷薄言旋。正念 慈宮倚望懸。縮
地未周鐘數點。龍樓鳳閣總依然。

遺詩摘錄

我國爲文學之古國。前人所著述者。已汗牛充棟。不可勝紀。然我國文人習慣。凡有所得。皆不欲付梓傳世。只作自家講究而已。除却屬於列朝典故外。其他僅得之抄錄各本。間亦有不成帙者。近探得昔辰詩文各篇。敬錄登諸報。以爲我國文人之紀念物。海內諸君子閱者。如有錯誤之點。祈書示正爲感。

浴翠山 黎聖尊題

三折流邊浴翠山。孤高如削玉峯寒。尋來廢寺凌風上。覽盡荒碑帶暝還。穿密却疑天地小。登高頓覺水雲寬。山光不改渾如昨。回首英雄一夢閒。

龍隊山

千仞層垂古化城。攀緣石磴步禪扃。李朝怪誕碑空在。明寇凶殘寺已更。路少人蹤苔甲綠。山多春雨曉痕青。登高眼界無窮著。萬里茫茫草樹平。

雲磊山 鄭靖王題

名勝高標第一洲。山容如黛水如油。半峯雲

洞邀玄鶴。平漲河門。狎白鷗。雲徑鳥緣。頑石脚。星槎客渡。急灘頭。凭高欲盡觀。瀾興碧落滄溟一色秋。

徐式洞 黎桂堂公題

海上羣仙事渺茫。碧桃洞口久荒涼。乾坤一褐窮。徐式雲水雙蛾老。絳香石鼓有聲。敲曉月沙監無味。濕秋霜。世人苦作天台夢。誰識天台亦戲場。

古弄城

荒壘頽垣四百秋。瓜藤豆蔓放春疇。碧波已

洗陳王眼。青草難遮沐。屐羞黃犢。雨餘耕古。劍寒禽月下。噪殘樓。封疆何用勤開闢。堯舜當年只九州。

鳳凰山

陳朝朱文貞題

萬疊蒼山。簇畫屏。斜陽倒掛半溪明。緣蘿徑裏無人到。山鵲啼。闌時一聲。

經章陽渡懷古

范立齋

扁舟曉發章陽渡。但見沙鷗戲洲渚。欲尋陳



石農詩集

石農先生。姓阮名思僊。北寧榆林人。登二甲進士。官至吏部尚書。文章事業。彪炳一世。錄其遺集。吉光片羽。願共寶焉。

對月獨酌

自我見海月。不知幾成弦。昨夜見月缺。今夜見月圓。月輪有圓缺。人事有推遷。對月不醉月。浩歌何爲焉。曲徑轉花影。廣庭羅樹陰。池水清且明。星斗交浮沉。萬象淨良夜。一鳥鳴前林。脫巾灑涼風。拂袖橫素琴。有酒且自酌。云誰獲我心。醉弄石上月。拂之去復來。安得擲綵橋。海外窺蓬萊。麻姑削炮麟。青蓮飛大杯。酣暢觀天地。悲歌激風雷。念此酌復酌。顧影醉且歌。明月君且去。我醉柰君何。

元古戰場。想在中流激湍處。

鴻嶺香跡寺

阮希思題

隙間攀躋到上方。依然掬水尙聞香。色空意味青庵外。香火因緣白石旁。樂處林泉相曉蔓。望中天海共青蒼。漫遊覽盡莊山趣。梅影松聲又夕陽。

七夕有感

今夕是何夕。秋月皓東壁。仰觀霄漢間。衆星何歷歷。黃姑與織女。相去不盈尺。云何俄頃中。玄雲忽復積。盈盈一帶水。風雨遊安適。雖有七襄錦。恨無重風翮。一會年復年。烏鵲空役役。河梁幾千丈。如何離恨長。星河自清淺。不洗我心傷。一心如葵花。望君太陽光。况此良霄會。臨風易斷腸。空傳天上會。烟波不知津。秋愁不可度。秋夜不易晨。人家事乞巧。巧智傷吾真。世無嚴君平。支機問何人。濯纓清漢流。願言拂素塵。

● 香江竹枝詞

前月^卓歸京。遇友人章民君相與泛舟香江。對月小飲。敘十年之別。君於酩酊中。口占香江竹枝詞六首。^卓記而錄之。以爲香江重逢之紀念物。

羣山西峙鬱蒼蒼。天遣東來一水長。北奠皇居南與國。江流終古在中央。

北岸相看南岸遙。虹霓宛轉架天腰。可憐三十年前客。未睹人間有鐵橋。
垂楊芳艸鬥娉婷。盡日車聲雜市聲。最是橋南歡喜地。夜來燈影若繁星。
暑氣騰騰六月天。熙來攘往總堪憐。世間儘有閒夫婦。明月清風貯一船。
水陸生涯各自由。郎推車去妾操舟。舟車不用載離別。薄暮相逢江上頭。
潮退東流漲復西。江心多少貯淤泥。郎心莫漫如江水。累妾中宵背面啼。

● 雜俎

● 法國翰林會

法國素以文學名於世界。其人嗜文學。常愛誦佳文。聆善語。同一理想也。而著爲言論。其文辭。其旨趣。法人常比他國人爲優。古時希臘人甚好文學。而以雅典爲最。其文章之佳。推爲當時絕品。法國文章。酷肖雅典。近時各國文界。稱法國爲今世之雅典云。匪唯文章。法人之性情風格。其高雅亦大類雅典人。噫。是亦文學之影響也。

今日全世界。無一國焉。能聚多數之文人。成一大淵藪。如法國之翰林會者。是會卽全法國文學界之中心點也。會員四十人。皆法國士林之翹楚者。皆嘗從事著述。爲世界所知名者。法國翰林諸公。已爲世人目以「不死」之徽號。蓋謂富於著述。文籍刊行。流芳萬古。其名足以不死也。夫翰林會員。數只於四十人。必此四十人外。其能文之佳士。亦復何限。而此四十人。則其領袖者也。且全國文人。咸以是爲成就之目的地。盡瘁於文界。以求達此至高至貴之希望焉。故凡國中之大文學家。皆此「不死」隊之後備軍也。

法國翰林會之設。始於千六百三十四年。大司教里士留 (Richelieu) 爲路易十三 (Louis XIII) 王朝國務卿。聞其時有文士數人。常相聚於一文士工拉耳 (Conrart) 家。相與評論文籍。大司教議欲以此數人私會改爲全國公會。乃集國內諸文士。發起翰林會焉。會員四十人。內公舉三人。一會長。一掌印。一書記。經紀會事。會長掌印。三月一更選。書記則任終其身焉。常會不許外人參觀。惟每年歲底開一大會。名常年公衆會。則許外人列席聽演。會中演說。常爲會長所宣言。關於褒獎諸有功

德者。及書記所報告關於褒獎諸有佳著作者。蓋翰林會對於國民之任務有二。一遞年調查全國。不論男女老少。凡做得事業。有大功德於人者。對衆褒獎。以爲激勵。即以文章之勢力。助國民道德之進步也。一評閱年內出版諸文籍。賞其佳者。即以諸老成所得於文界之經歷。定文章衡尺。爲後進模型也。

翰林會有一公本。或餽獻者讓與者留寄者之財產。或一二十大富豪。請於會。捐一賞款。按年繳納。以賞有大功德者及有佳著作者。

會員所幹之事。爲撰《法文大字典》一部。逐字解釋。爲國文之標準云。茲事至爲重大。觀自有翰林會以來。全部未成其半。可知矣。

會中第一慶節。爲歡迎新會員之日。此四十員中有一員不幸逝世時。全會公舉其他一人充補是缺。國內文士願入會者。出爲候選員。中選者全會擇日行歡迎禮。禮極隆重。誠文士一生之極大榮譽。日云。腰懸寶劍。身衣品袍。立談圓屋下。（翰林院之中間正屋爲圓形）萬目所視。萬手所指。榮莫榮焉。比之吾國進士榮歸時。殆有過之也。新翰林讀一長篇演說。謝會員之公舉。贊揚舊翰林之盛業。其演詞。文必佳。演必動人聽。譽前人之長。其鋪敘必當。演畢。會長次起演說。賀會員之得人。於新翰林與舊翰林之才藝。各致頌辭焉。卽如千九百十年。都密克（René Doumic）先生代波節（Gaston Boissier）先生爲翰林會員。會長法克（Emile Faguet）先生演說詞如左。

法克（Emile Faguet）都密克（René Doumic）二先生皆文界之大批評家。波節（Gaston Boissier）乃一史學家。嘗著有羅馬古史多種。

君候乎。吾會前輩達勒曼（Talleyment）先生。爲昔時翰林院中之著名演說家。後德部斯（de Boze）先

生頌之曰。先生演說。善能爲吾會之死者寫生。會中人咸樂聽之。致欲常有會期。得觀先生舌畫之妙墨。鄙人亦請向君侯前致辭曰。適纔君侯演說。可謂善能形容波節(Bossier)先生。如先生所自言者。演詞之文。平淡如希臘。莊嚴如羅馬。而又不失吾法人高雅之情致云。

此時都密克(Dominic)先生方喪其夫人。夫人亦一女文學家。法克(Faguet)先生略述夫人行狀數言。善於贊揚。語致動聽。其辭曰。方入高等師範學堂時。君侯已與一名家女訂婚。卒業後遂與知己之愛友行婚禮。夫人卽吾法女界中一聰慧之女士也。深於精神學文藝學。感覺超。智識富。自成婚至永訣。君侯無一行之草稿。不呈正於夫人。無一本之文籍。不求同意於夫人。無一發明之新理想。爲夫人所不得預。無一篇演說。於未開演時。爲夫人所不得先聽。此一長期中。君侯已備享人世之幸福。此幸福君侯於家庭中見之。君侯自求而自得之。而其一入又力爲君侯致之。人生至愉快。至真正之幸福。殆無過於此矣。

今君侯已不能不讀維若(Louis Veuillot)氏之絕言曰。噫我之救主乎。毋寧置我於悲慘之途。而脫我於絕望之地。以今日之淒涼。較昔年之森合。猶當謝此幾年中賞心樂事之賜。卽此橫遭之凶閔。君侯亦能困心衡慮。增進其堅忍之毅力。與高尚之感情。則上帝所造於君侯者。不其偉耶。此一段勸解之詞。深沉婉曲。沁人心脾。蓋文章之感人。也甚矣。文章而至於感人。則誠絕大之佳作也。終演一段。以翰林院作結。詞亦甚善。錄之如左。

今而後請以歡喜之熱誠。列席斯會。吾儕會員等候多時矣。君侯今日與吾儕晤敘之地。卽吾儕十年來虛左以望君侯之地也。吾儕雖向未獲挹芝顏。然代面之文籍。在吾儕目中者。不知凡幾。幸勿以生客爲嫌也。君侯今與吾儕握手斯地。然後知其中大有深趣。匪惟今日爲吾儕歡迎君侯之

第一次紀念。同聲同氣。樂可知也。卽平時聚首。有錦心繡口之雄辨家焉。其辨鋒之銳。至於社會通行平易之語。一經點綴。便放舌花。令牧叟聞之而浮杯。村嫗聞之而拍掌。有學富五車才高八斗之大文家焉。其文之佳。致使能文者亦不得不見之而咋舌曰。吾甚不解作者之手。有何神工。乃同是紙墨也。一經揮洒。便爲常人所構造不及。有事業滿寰區。仕宦至將相。而其究也。恂恂然一書生焉。脫屣功名。留心墳典。以名山著作爲不朽之盛業云。君侯將日與此等人把晤。芝蘭臭味。賞心樂事。當何如耶。且國中著述諸家。曾爲吾法占全球文界之大榮譽者。彼亦何所歉。而必於奉吾會之批閱。以爲一定不易之準繩。則此中之價值居何等也。吾會中相待以友誼之誠。無畛域之情。無水火之見。殆哲學之所謂(調和派)焉。君侯乎。我輩聚談之圓屋。卽命名曰。哲學之代表形。亦無不可。此等演說。誠所謂文章餞饌。予吾人以快耳之一大宴席云。

戰爭以來。會中不復行歡迎新員禮。蓋欲俟戰功告成。凱旋酒與握手杯合酌也。然戰局蔓延。非尅日所能奏捷。今年翰林會擬復行歡迎新員禮。新員中之著名者。爲里歐德(J. Yauter)大將與部德魯斯(Boutroux)貝耳孫(Bergson)二先生也。大將前爲摩洛哥總督。本年領陸軍部總長。謀略旣嫻。文學亦富。二先生皆文學著名家。且世界哲學家之表表者也。翰林會行將開一大宴席。以文章餞饌之數篇大演說。餉我世人之耳焉。


▲▲ 京遊歸談

阮伯卓

記者前月因公抵京。拜謝新命。並候謁部堂列貴爵大人。敬詢當道者近日所持之政見。先候謁東閣尊室大人。大人年齒已尊。而精神尙壯旺。但秉性沉默。對於政見。不輕表示。入謁辰僅

略詢寒暄而已。繼謁吏部堂阮大人。大人略示我國進步之前途。今日最爲有望。但凡百政事。宜隨乎國民之程度。不可求速。漸進爲要。現日最宜急講之問題。惟國民生計而已。謀民生計。須從商農工三者著手。然我民商學未講。未可輕易言商。只工業之一途。所當急鼓勵爲要。次謁學部堂胡大人。大人對於學問一事。極羨稱歐學之粹美。幾有傾向於西學方面之意。大人又謂前年士夫之太熱心於文明事業。故出於燥急。若夫進化。當以其漸云。次謁工部堂段大人。大人謂一國文明之表號。在形式上。故余對於工作等事。不務其多。只務其少作而精緻工美。大人又出以近日所草就之條陳。屬於開商墾荒等事相示。記者問此各條陳。可否許領歸登報。大人謂姑俟之異日。記者逗留京中。約一星期內。多得諸鉅公之指示教訓。記者曾以本雜誌所懷之目的呈達。均見許可。十年去國。歸來得沐春風。想生平所希望於我國者。立學開商等事。今必賴列大人以有勢力之鼓舞而振興之矣。我民幸福。當亦無量。又竊聞

皇上近來曾以三問題詢探朝士公議。一爲尊君權。二爲開民智。三爲廣民生。此亦可想見我皇上重天職愛國民之至意。且京中部院。今日比十年前。大爲改觀。新文明事業。已現出一線光。影。令人到此。轉生無限欣感。橫山雲嶺多佳氣。願借南風共往還。記者臨行辰。敬以此一語留別。



 辰談

 歐戰之部

 戰禍其何日了耶

今日驚天動地之戰局。其傷人類之性命。可謂極矣。凡有感覺有思想者。誰不欲常辰得知歐洲之戰况。以覘人類之活劇者乎。且今茲戰禍已延蔓於世界。凡所發生之軍政上外交上最有關係於各國將來之運命。固令人所欲得而知之。是以茲期吾儕且略敘本年七月及八月期內所發生之戰事。

 法軍方面

七月之上旬。德軍一次被敗於法。無異於昔年在華頓之敗績。且於春間法英利用攻勢。則德軍已行退却。並失地甚多。其間有一重地德參謀部曾屢次謀收復而卒弗獲。即爲廉士 (Reims) 省北之克拉歐尼 (Crémant) 高地是也。七月二日。法軍據守此高地。對於愛雷德 (Ailette) 附近。及德軍方面之道路。可以居高瞰望。故一聞德砲之猛擊。則知彼軍必以攻勢來。

果爾。德軍以兩大團之精兵約四萬人前來應用攻勢。而法軍則僅輕步兵四大隊約四千人而已。方德軍開始進攻之辰。則法軍以哥利夫尼高地之一區域餌敵。不意德軍相率引身自投於陷阱。法砲兵埋伏於陣線之後方。乘德軍已進入辰轟擊之。纔於數分鍾內。竭力勦滅敵兵幾盡。及停放後。法之四大隊乘勢以突擊敵軍之殘隊。作衝鋒戰。德軍或遁走或投降無算。屍橫於陣地上。下午

約三點。德軍大敗。精兵之兩大團。消滅殆盡。而法軍之受損傷者無幾。是則以四千兵而戰敗四萬兵之敵也。

自此至今。自華頓至海際之法英軍陣線。皆見德軍延蔓攻擊。七月十日。於巨砲猛射後。奪得英軍在比境尼耳波附近之陣地。其餘都被失敗。損害亦巨。

德參謀部曾死力求尺寸之進取。聲言大勝。以慰國民之希望心。然同辰俄軍向奧軍猛戰。並德謀與俄軍獨議和之計。卒無成效。且加以碧忒曼荷兒威克 (Bethmen Holweg) 首相既倒之後。則其內情最爲困難。此事姑於下述之。

雖德軍向法軍攻擊無效。然戰况劇烈。則不可以筆墨描寫。此爭彼持。鎗劍之餘。又繼之交拳接腕。爲徒手戰。德軍死屍山積。而愈日愈見其加入不已。只觀此等攻勢。則知法軍之守勢。其英勇爲何似。此一戰德軍之損害。比之華頓戰役。無少差異。而其間酷似華頓之戰者。以此戰亦是德皇太子指揮軍隊也。彼德國之將來皇帝。方設計以制勝。戰略可謂精矣。然孰意其卒無一得。噫。前此在華頓之役。既不能享有此等榮譽。至今復賭無數人之性命。爲犧爲牲。徒見其增損而無益耳。

一旦德之帝系被失位。而不復以流血爲事。則德皇太子。誠其爲萬民之怨府也。今年法英方面。於春間獲勝利之後。復開始整備其作戰之新陣地。其計畫與形勢。較前又爲精密完善。

這法英之新戰地。開始於今年八月初一日作戰。法英軍目的。決在驅逐德軍。離出比國之平原。自愛士古 (Escault) 河至於海際。以收復比國之海岸。使德潛艇無依泊之地也。

八月一日。法英軍砲兵施猛烈射擊。然後突攻德軍陣勢。據守二十四吉米長線。自衣貝勒 (Ypres)

至海岸。占得許多村落。且又能越過意塞耳(Yser)河。蓋此河曾於一千九百十四年十月至今已爲雙方軍隊之界限也。自月之初旬。雖此地方苦雨不止。英軍本逐漸前進。大有秩序。其戰事上之進步可知也。

屬於南面。則英軍尙包圍稜斯(Lens)省。此省固爲產煤最富之地。省城之外。已落於英軍之手。本月十八日。法英之陣地。攻拔蘭日馬耳克(Langemarck)省。擒獲一千二百德俘。及巨礮無算。

觀此屢次戰勝。亦足以表聯協軍之猛力。大法之將才。而且足使聯協系各國之民。懷有樂觀的。而確信將來全勝之局。必屬於我軍無疑也。

繼此法英軍壓擊德軍於佛蘭德雷(Flandre)。法軍又於二十日開始用攻勢。占據二十五吉米之長線。使留存於法境內之德軍翼線。重受其危險。意軍向來已經營占獲之陣地。亦於月之二十日同時前進於德利斯德(Frieste)。由是觀之。則法英意之政府。具有制敵能力。縱俄國困難之情勢。何如。亦決在進行。而敵人媾和之說。未嘗有所動搖也。

七月初七日。法國下議院集會。表決屬於政治各問題。則其時已公認曰。雖俄軍暫時停頓。然聯協軍已經過危險之一步。又公告曰。本信用里波(Ridout)首相之政策。又歡迎美國軍隊之新臨法境。緣於七月上旬。美國軍隊與耳貝森(Pershing)大將及其參謀部。第一次抵達法境。而派往美國之霞飛統帥。亦以是日歸。其時在巴黎城歡迎美國軍隊之典。極其隆盛。令人不可以言狀。

美之經營手段。素得名於世。現日已組織成最猛之一軍隊。器械無不完備。飛機隊則達二萬隻。其在美國之各造船廠。則從速製造。以補缺英國已被敵潛艦擊沉之各商船。

且今年七月內。商船之被擊於敵潛艦者。比之前幾月。已見減少。觀此則知德國潛艦之危險。幾已

成爲過渡時代矣。然可確信者。德軍決不可以潛艇之政策。而破壞聯協各國之艦隊。無論何時。聯協各國。本主張在海戰一方面。並德人以潛艦包圍英國各海港之想望。則亦已化成夢幻矣。夫德人慣以驕橫野蠻手段爲威嚇之行動。然究之。又何所得哉。

▲俄京之變

七月初旬。俄國情形。已漸有樂觀。自月之初一日至三日。在俄里西(Galicie)方面之俄軍隊。服從加連士奇(Kerensky)大將之命令。而大將乃俄國熱誠愛國的人物。對於暫時政府。曾担有重責者也。此數日大將既率兵攻擊德奧軍。擒獲一萬四千戰俘。及大礮四十尊。其後數日。又進攻於斯達尼斯勞(Stanislaw)之西。亦得全勝。俄軍擒獲兵俘八千人。大砲及機關槍無算。至七月十日。復行前進。俄軍占得哈里埃斯(Halics)省。斥退敵兵。奧軍全線。都被退却。使俄里西之都市。陷於危急。而匈加利恐不日亦爲俄軍所侵入矣。

這時期內。德首相被議院之彈核。遂請辭職。

聯協各國。因此確知敵軍之必敗。英首相電達于俄首相曰。近日俄軍戰勝之績。足以證明自由民主之大俄國。深知夫塞比兩國未能脫離於他人之武力下。及各國政府之責任。未能完全明白。則決不能希望永久和平之局。

自七月十八日之後。忽聞俄國情勢。又大變動。在俄里西之俄軍。日日只行退却。致左面軍隊。無復有所掩蔽。此誠一險象也。

同日於貝德羅克拉(Petrograd)京大亂。幾乎爲臨時政府之危。

此變結果何如。姑於下敘。今先略述前此六個月間之經過。以知此事發生之原因。

俄京近日傾覆帝制。改造政府之舉。乃由上議院及在貝德羅克拉之工黨與兵黨相聯合。上議院則惟少年黨爲有勢力。復加以米留哥夫 (Milioukov) 公爲之領袖。而此公亦曾聲明舊制度之差錯及其罪過也。今日誰不知俄皇后乃是德人之種族。既侵僭其夫權。及欺弄廷臣。而使爲德作俚者。得入政府之席。其禍延至於軍隊中亦有之。卽如兵部尙書斯都耳墨耳 (Sturmer) 氏。亦曾預此叛

謀。致一千九百十六年之終期。魯軍因此而重受損害。夫皇家之叛謀。既若是其洩露。則人民誰不因此生怨憤。傾覆帝系。組織臨時政府。開會議定憲法。卒之民主國之造成。原有以也。

夫唱成此義舉之少年黨。乃多屬於識者社會之人物。而又酷愛自由也。然對於臣民及工黨。無甚表同情。此黨前此固欲倣倣英國之憲法。然近日則又傾向於民主方面。但無論如何。此次義舉。此黨寔居首功。其領袖諸人。則有米留哥夫、聖克雷夫 (Chingaref)、客沙古夫 (Goutchkof) 及雷瓦夫

Лов親王。都是以公明得名於世之諸人者。雖既唱成義舉。而其後也。寔任他人作主張。不復干預。蓋凡公明人物。本不欲施此內亂之殘暴行爲也。

此次構成內亂者。皆彼饑寒困苦之常民。自數十世紀以來。曾受壓制之威力而思欲得逞也。况用以弭內亂之軍士。亦由常民派出。故對於同黨者之舉動。不肯下手而勦除之。

其始也。兵黨與工黨相爲聯結。而亦由此聯結之故。遂有工兵兩黨之會議於貝德羅克拉京。卒之延蔓勢力於其他各省。

工兵會議之各議員。遂表示屬於社會及邦交之目的。

於是乎軍士四面騷擾。而前此起義著名人物。亦從此加入。此等人之中。復有不黨而爲德倭者之輩。預其列。卽如雷尼納 (Lenin) 君其人者。彼旅於瑞士。而復得特別之護照紙。經過德俄兩國。其目的在以身事敵。演出怪劇於白己國土。且因彼等爲之主動。故德人能設計使俄國新政府。大爲紊亂。無異乎昔時借俄皇后之手。而使舊政府之傾破也。

方初時於俄國中有兩黨互爭。一爲上議院。卽爲平民及執中黨派。一爲兵工各會議。卽屬於社會黨派。此互爭之事。誠令人可引爲憾惜。幾於三個月爭持不止。不至於大激動者。以其稍有節制。及賴刑部總長加連士奇 (Kerensky) 公爲之調停。蓋公之德望。曾得兩黨派之信仰。而公認之爲調人也。然湍水百激。其潰堤之勢。亦立至矣。

國中重要之問題。則在於閩外一事。兵工會議。則大排擊帝室侵掠之政策。而新政府方面。則欲勇往直前。以竟開戰來茲未成之業。有閣員米留哥夫氏。則毅然唱強俄之政策。宣言於衆曰。收復君士旦丁堡。乃俄國前途最視爲生死之問題也。

社會黨遂因此與米留哥夫公啓釁。五月五日。既於貝德羅克拉京演出流血之舉。政府亦欲袒援米留哥夫公。然其後數日。兵部總長決志辭職。則危險之局面。又因之而增焉。

於調停困難之後。至五月十八日。漸克就緒。於是遂立一聯合內閣。閣員之工兵會議者六人。全是屬於社會黨。

自此而後。俄國已合兩黨而組成一完全政府。幾乎可望和衷共濟。以謀政治之進步矣。

但吾人所當急講者。在乎戰爭問題。美國之加入。及俄國之內亂。則誠與吾人以觀測戰事之機會。

五月十八日。臨時政府之公告。決定欲立時達到公共調和之望。則當不占地不賠款。只照遵各民族自主之人道主義。其公告文如左。現君主之制度已傾倒。且內外政都從民主上組織。則確知有絕好的機會。使聯合系各國。可永久構成和局。並維持各民族之博愛心。臨時政府。行將設法與聯合各國調停其穩當之和局。及不拂公共之尊旨。

自公告後。凡因敵國之講和而答復。或與聯合各國代表相商議之際。則臨時政府之內閣。決然不認俄國有單獨議和之舉。

德國當局諸人。見俄國經變亂而復得振整。且又知保全國體則因之惱恨。復以金錢勢力而運動於前。此既有德人秘計預行起亂之各地。親德派首領雷尼納君。竭力鼓動議和。卒使俄軍少許部分。爲其所搖惑。蓋以爲不佔地不賠款。則和屬有利。安用戰爲。從是而俄軍只視我面前之壕壘中人。皆兄弟已耳。

方德軍與法英軍陣勢相抗拒之時。則在俄方面。兵卒又與德軍相結合。嗟乎俄人之誤點。至此極矣。幸因各方面之諫阻。非然者禍將胡底哉。

上而政府而工兵黨議會以及國民議會。皆萬口齊聲。謂此媾和一事。最爲喪失俄國名譽之謬舉。於是遂下令嚴懲其逃逸之軍士。

加連士奇公。乃爲當時之重要人物。出任兵部總長。竭力奮起士卒。遍往各陣線巡閱。公與法國都馬 Thomas 總長。同爲社會中人也。

賴此堅確不拔之毅力。故至六月之終旬。復爲德人危急之時候。然其後復有親德餘黨自柏林混入。而俄政府殆防之不勝防矣。

七月十日。俄軍隊一部份。被德人誘惑。起變於俄京。欲圍擒政府諸人。占據各公庫。及各銀行。叩其起事原由。則彼輩只謂由政府增派各軍赴戰地。故迫而出此。在華羅士德(Gronstadt)之水軍亦同時生變。斯時俄里西軍。亦已暗中運動。一聞俄京變起。則士卒皆不服從將令。棄地而走。遂使陣勢大潰。德軍乘此前進。直達於達耳納貝地。無異於河川之注海焉。

在俄京則加連士奇總長。及其同事諸友。憑高尚之決心。以爲對付。七月二十日。已勦平叛黨。而在俄里西方面。則第二陣線之各軍隊。竭力抵抗。阻德軍之前進。並鎗斃其以地畀敵之各敗劣將士。當斯時誠爲俄國最困頓之時期也。至二十日。俄京秩序已盡行平復。勳烈顯赫之加連士奇公。得舉爲首相。操有特權。凡起變之兵卒。皆被擒獲。並搜獲敵人騙惑的書證。都付印以示衆。然屬於軍事上。則無甚佳况。俄軍駐在俄里西及貝古偉尼(Bukovine)之正南。須作收容攻擊。以退歸於後方陣地。循德涅斯德耳(Dniester)河之一線。及已佔獲之地。全被喪失。

此纔過去之變局。影響及於芬蘭(Finlande)華龍斯達德(Gronstadt)及基夫(Kief)各地。紛擾之局。無異於俄京也。

八月期間。賴有加連士奇公果斷之決心。而復得工兵黨及民黨之援助。故情勢因之穩靜。憲法議會。已認定於本年十月三十日集合。想自今以至是日。必不復生何等枝節。而凡熱誠愛國之君子。當以國事爲前提。担此重責。固其所也。

方俄軍在俄里西方面被縮退之期內。則位置於俄軍左側之魯國軍隊。因有法參謀部爲之整頓指揮。預行出戰。遂乘勢攻襲德軍。以分敵人之勢。使俄軍不至於壓迫。

七月二十五日。魯軍與俄軍聯合於右側。攻入奧軍陣地。長線約達二十四吉米。擒獲多數之軍俘。

並器械。魯軍又炤此前進。至八月十日方暫止。然俄軍被退於貝古偉尼陣勢亦因之失利。德軍竭力以包圍魯軍。間有薄接魯軍之陣地者。自八月十日。俄魯軍不得不據地以行守勢。德軍屢次挑戰。皆被敗績。俄軍形勢未穩。故當日想俄魯軍未可以應用攻勢。

▲▲ 巴耳幹希臘及其他各陣地

在薩羅尼克(Salonique)之聯協軍方面。亦無發生重大之事故。自希臘前王禪位之後。國中情勢比前大為變換。今之新王。則樂於與聯協系各國共表同情也。

今年六月二十三日維尼斯羅斯(Venizelos)氏秉閣政。至二十九日。希王以絕交書交出於奧德保土等國。並與之開戰。希臘之軍隊已與在薩羅尼克之軍隊加入作戰。

維尼斯羅斯內閣已與聯協各國代表若那耳(Jonart)氏商議其嚴懲親德黨。及杜絕德國金錢運動之舉。

在小亞細亞之墨蘇波達米各陣線。則今尚防守以乘勢。據最後之消息。則土軍將欲以攻勢進擊埃及。或進擊在亞耳墨尼(Armenie)之俄軍。亦未可知也。

▲▲ 德國今年七月期內之危機

綜觀上述。則孰不知德軍竭力。期於法境得些小之戰利。以誇大戰績。鼓國民之氣者乎。然德國之民情。於七月期內。誠使德政府增一可憂之險象。斯時國內人民。大有退挫志。而至於主張作戰之碧忒曼荷兒威首相亦不得不退讓德社會黨講和條件之宣唱。

復加以纔發生之重大事變。幾使挪威國與德國開戰。而德國內閣之體統亦因之全失。六月二十四日。在克里斯的亞尼亞 (Christiania) 地方。搜獲各房屋及各停車場。多有炸彈炸藥藏隱其內。而干犯此案之德人亦同辰被獲。其間有魯旦非耳 (Rautentell) 男爵其人者。此公供稱此各危險物。決定携往於新洛德 (Sinnland) 以毀破各機器廠及各船艦者。

挪威國已通告德政府。謂宜召回德使及向挪威國謝罪。德民聞之。全國皆大騷動。七月議院會議之期內。德國情勢漸見危急。社會黨首領士斯德曼 (Scheidemann) 氏有云。宜廢棄吞併的政策。並排斥其以吞併爲目的之諸人。若然則德國全國人皆欲和局之告成。而絕不侵掠人之一寸土地者。

此語一出。德首相不肯答復。但敘及俄國之情勢。則首相又公認曰。縱能設法與俄國相媾和。則德政府亦樂於聽受。其後社會黨中人雷氏 (Ledeburg) 又曰。正我首相亦以吞併爲目的之一人也。然除却無知之輩外。誰不曰。我德國決無制勝敵國之望。

後二日。社會黨又詰責政府屬於戰爭之事。及士卒殘暴之行動。則兵部大臣當衆演說。謂不服議院之建議。及自認與議院反對。此突如其來之演說詞。遂激起公衆之怒。自由各黨於是與院右之黨及政府反對。發生種種變故。國內各報紙皆排擊首相。要其必辭職。國情大爲騷動。故德皇屢次開臨時會議。並許 Prusse 國以投票之權。

七月十四日。則首相及兵部大臣皆辭職。而米沙利 (Michaelis) 氏乃一躍而登首相之席。此暗幕中之一劇。德皇及各謀士之計籌何如。亦誠令人無從窺測。然可預知夫因德皇太子及各將終日營營於強德的主義。遂使德首相不得不隱忍而告退。首相退位時。德皇降諭宣慰。終有謂

制勝敵人之事。正未能必。此亦可謂由衷之言矣。雖德各報謂新首相本贊同強德的主義。然於七月十九日。見其宣言於議院云。德國作戰。非有掠地之意。德國亦未嘗講和。然和局而能維持德國之體統。能留德國具各種特權。並可以保存各民族永遠和平之局。則德國亦樂於聽受。總而言之。德國現時不復舉行其掀天揭地之事業。議院投票屬於軍事上預算者。則人人皆主張媾和而不侵地之一事。嗟乎此等態度。殊亦令人易與者也。

▲德國媾和之計畫

德政府見戰况愈日不利。而聯協系方面。則黨羽日多。難以一手擎天之力。與之抗拒。於是設計以謀媾和之機會。

一千九百十六年。德國爲第一次之和局談片。卒不見信於聯協各國。今年在俄京之德國附屬人。又謀聯絡各國之社會黨。以增自己之左援。而要求和局之易成功者。

果爾。俄京纔起變。而俄國社會黨。既向各國社會黨。順認親抵斯達古耳(Stockholm)開萬國公議。以調停和局。瑞典及丹麥國之社會黨。亦担認整頓此會議場所。但聯協各政府。早知此乃德國社會黨所預設之陷阱。而此黨又與政府商議。先赴會場。聯協各國。因此遂禁國人不得赴會。七月上旬。德國各委員已於此久待。而終不見他國赴會。由此之故。而德國議院發生種種事變。致碧忒曼威兒克首相必至受一回之窘辱。

這謀雖不成。而德皇亦未嘗因此而餒志。纔繼此一月。德國復使奧國求助於教皇。出而主張和局。如米沙利斯氏之各款。而奧土保及親德之各中立國。遂同聲而贊成之。聯協系各國。則因教皇之

請。不忍拒絕。亦準調查所提出之各款。然亦已知由德國從中所陰囑。此無亦德人前此欲指揮社會黨而無成。今復轉向於教會方面耶。巴黎時報曾質問教皇何以今日只講和平公理之連絡。而不記及一千九百七十一年。及一千九百十四年之殘暴行動。又云。縱今日出而調停者。則調人最要之分事。亦當知曲直者何在。其時美國各報亦不服教皇之有此舉。總而言之。則至今八月之二十日。戰國情形。無異於歲首時候。雖敵人乘得俄國內亂之絕好的機會。然聯協系方面不因此而失利也。日耳曼之命運。不久行將解決。千鈞累卵。望之者能不爲德人一危哉。吾儕另觀左之事故。則知亞東之局。前此多爲德人之利。然至今大勢已去。德人亦從此絕望於遠東矣。

● 亞東之部

▲ 暹羅國之加入戰局

今年七月二十三日。暹國已與德奧宣戰。凡此兩敵國人民及各戰艦在暹國領土內者。皆被俘獲及沒收矣。暹國加入。則可以增大聯合系在東亞之勢力。雖此國爲亞洲南部之一小國。然嗣來已經營布置。知自振整其國。圖存獨立。與世界萬國共躋於文明之地位。屬於政治上精神上。令人不可以小國易視之也。德國向來憑野心家之計畫。對於暹國。欲侵掠其經濟上之權利。然際此楚歌四面之辰。能無令德人計畫至今已一敗塗地耶。

▲ 中國時局

張勳之復辟。段氏之擁護共和。前期於中國時事。已略記之矣。然此次張氏之起變者。雖曰張與康

忠於滿洲帝系之故。但其禍始原因。固自有在。今吾儕試以中國某報之登載證之。

滬報接北京十四日路透電。略謂。近日發現數事。足以證明張勳復辟之舉。曾得德奧人之助。或傳德國曾以金錢買張。此非無因。當恢復帝制以前。張勳曾通電痛斥梁啓超湯化龍。謂梁湯爲私利起見。主張向德宣戰。致外交上引起種種困難問題。國內發起種種擾亂云云。張勳及其家屬之被救。亦顯爲事前預備者。據可靠消息。星期三晚及星期四晨。有一外國人相隨左右。此人非德籍卽奧籍。卽送張至使館界之人。各使署衛隊之司令。事前曾議決華人無特別照會者。一概不准入使館區域。張勳有此照會與否。則不可知。因張勳入境之地。爲奧衛兵所守也。總之德人此次又遭失敗。有華人視之。此次之亂。寔德人有以促成之。故德人自此。又招華人之恨。荷蘭此事亦受人評論。深爲不幸。天壇張勳兵投順後。要求當日發餉三個月。否則續戰。共和軍苟欲赴津取銀。時已不及。故段芝貴不得不向正金借洋八萬元。以遂其要求。此張兵所以直至晚間始繳械。而兩方面之死傷所以若是之小也。段氏既定張軍後。要請黎總統復職。黎公堅辭不受。只在法國醫院養病。答復段氏。謂炤憲法第四十二條總統不能行其職權之時。以副總統代任。而推舉馮國璋代已。黎氏有通告辭職一道長電。另於下期登載。馮氏迫於公請。故八月初旬已抵北京。致電各省。略謂。抵京後曾迭次力勸黎總統復職。惟無效。而適值比國公使於七月六日呈遞國書。各國公使亦於是日入覲。故本總統逼得就職。馮就職後。贊成段氏內閣之計畫。一致進行云。

屬於國會方面。舊國會已經解散。人皆知之矣。北京國務院於七月二十四日發出召集臨時參議院之命令。蓋定爲一院制。以參議院行使立法職權。聞此院將於本年十月一日完全妥辦云。屬於北京政黨。上海通信社北京通信云。近日梁啓超湯化龍輩惟急於組黨。欲吸收討論會分

子以爲組織一大黨之豫備。二十四日特開研究討論兩會聯合會。到者約百餘人。以爲融洽兩黨黨員感情之用。其最重要問題。則並未提出。至於黨魁黨名問題。尙未能商量就緒。黨魁問題梁派主張推梁爲總裁。湯派主張推馮（國璋）爲總裁。兩議尙未決定。至推段（祺瑞）爲該黨名譽總裁。則無疑義。黨名問題研究會主張用進步黨。討論會則不允。其他理事問題研究會已定三人。梁啓超湯化龍林長民。討論會已定二人。張國淦陸尊輿。其他則尙在協議中也。

屬於對德宣戰——段內閣之政策。欲因與德絕交之行動。加入聯協系各國。一可以增進自國之地位。二可乘此機會以支配國內之軍隊。嗣來因政黨內訌。故遲於進行。茲大局已定。遂開閣議對德宣戰。已於八月十四日十時。交出戰書於德。聞宣戰書之內容。係駁論德國不允認中國反對潛艇政策之最後通牒。並謂德國鼓動中國之政治亂事云。

屬於南方各省方面——自段氏再秉國政。黎氏辭職。馮國璋繼任總統後。則孫逸仙及其黨人。相率自上海赴廣東。欲預備組織南方政府。以與北方政府相反對。被解散之國會議員。亦擬於廣東召集開會。而海軍程璧光率海軍第一艦隊宣告獨立。於八月五日抵達廣東。以爲民黨之助。雖然南方政府。現辰亦未見發諸事實。由廣東廣西兩都督陳炳焜譚浩明等之態度。現未十分明瞭。廣東現辰則唱爲自主。孫逸仙演說雖多。然能起南方之人。使與北方反對與否。則正未可知也。但南方之勢力。必以陸榮廷爲中心點。而現下觀陸氏似不屬意於南方者。據如中國某報所謂現時勢力之分野。則大致分爲二派。一北方派。由段祺瑞馮國璋陸榮廷之勢力合成。一爲南方派。廣東政府及唐繼堯等四川中心派之合併。然則陸氏想亦難乎爲南方之利用矣。近日南方民黨之計畫。則聞擬以岑春煊爲首。唐繼堯副之。但亦僅屬於預備進行時期耳。北方政府對於此舉。主張不能調

停。則亦以武力解決。現下段氏亦已派吳光新率師往湖南先爲之預防云。要之據各報所傳說。則中國之亂局。始終全由德人所致。無異於德人之激變於俄國也。前此德人因中國之將宣戰。於是誘張勳爲復辟之舉。以破壞民國。使內顧不暇。何暇於謀外。及今共和國體已奠定矣。宣戰之局。勢不可避矣。德人乃激使南方與北方相對。使中國內訌。可減殺制我之軍力。德人狡計。可謂無奇不出。然竊思中國國民黨中人。多明達之份子。豈致甘受人欺。而自蹂躪其國者哉。

★ 日本時事

七月三十一日東京電。今日官報發表滿鮮行政統一關係勅令。其中拓殖局官制之內容大要如左。第二條拓殖局屬內閣總理大臣管理。司理朝鮮台灣樺太及關東州事務並滿鐵之事務。但關外交事務。不在此限。第

二條拓殖局設官如左。長官次長各一。(皆勅任)專任書記官三。專屬十二。(以下條項從略)

關東都督府官制改正之要點如左。關東都督府司關東州之管轄區域。並南滿洲鐵道之事務。都督統裁南滿鐵

道公司之事務。統率部下之軍隊。但關外交須受外務大臣之監督。滿洲警察事務。以憲兵隊與警察部併合辦理。又

同日勅令中村雄次郎任關東都督。前都督中村覺免任。另補軍事參議官。

● 國內時事

我國於本年七月期內。政治上有兩大事件。一爲宣佈北圻新律。一爲議定設立各高等學堂。宣佈新律之舉。已於前期時事中明敘。復接得全權大憲施行這律之議定。譯登如左。

總統東洋全權大臣

遵昭一千九百十一年十月二十日 旨諭定東洋全權之職權及經營屬於東洋政治並理財等款

遵昭一千八百八十四年六月六日大政府與大南政府互結之條約

遵昭一千九百零五年八月三十一日一千九百一十二年正月十四二十五等日 旨諭各道定東洋上審院屬於南案之權

南案之權

遵昭一千九百一十七年七月十六日 大南皇帝之敕諭

據北圻統使大臣及東洋司法院掌理所呈擬

議定如左

○第一款 凡關於南案衙門之組織民事商事訴訟法刑事訴訟法及刑律已編成新律經奉

大南皇帝一千九百一十七年七月十六日之敕諭別準施行於北圻各南案衙門者則定以一千九百一十八年正月

月初一日為始準一律施行於北圻轄內其釘從本議定之這新律以法文本為據

○第二款 屬於一千九百一十二年正月二十五日議定各款永作罷論

茲議定

一千九百一十七年七月十六日立於順京

總統東洋全權大憲 沙露署名

北圻統使大憲 哥連署名

東洋司法院掌理 提洵詞黎署名

屬於設各高等學堂。則七月初八日。全權大憲已委醫學堂監督骨岳公為全權府籌立各大學堂。總局之督辦。擬於八月底骨岳公與政廳馬迪公搭船偕往西貢。面呈與全權大人屬於大學堂之章程。以便施行云。前月十八日。全權大憲曾下議定一道。關於設這各高等學堂規則。譯登如左。

總統東洋全權大臣

遵昭千九百十一年十月二十日議定屬東洋全權之職權及整理東洋政治規則。

議定如左

- 第一款 設一籌立東洋各高等學堂之總局。此總局直隸於全權大憲。
- 第二款 這總局要在籌定學堂之組織。定這將預設各大學堂之規式及章程。以考取大法學生及本境學生入學。凡此各學堂。皆為東洋高等學堂。
- 第三款 這總局所設立大學堂之公共章程。則適用於東洋境內既成立或未成立之左列各大學堂者。
 - 醫科及泡製科學堂。
 - 獸醫學堂。
 - 工業學堂。(工程學。應用之化學電學。礦學。物理學。博物學。)
 - 農林學堂。
 - 商業學堂。
 - 航海及漁業學堂。
 - 法政學堂。
 - 師範學堂。
- 第四款 其設立學堂事宜。另由籌立各大學堂總局。隨屬地所需要。並經濟上政治上關係。而循序施行之。屬於這各大學堂之設立地點。及專門各學班之章程。則總局另採取各首憲及各公益團體之意見書及申請辭。
- 第五款 這籌立總局。另先時呈意見於全權大憲。俾得早料。以開辦各學堂於今年十月之期內。

一千九百十七年七月十八日

總統東洋全權大憲沙露署名

摘譯北京政聞報原文

★大總統抵達北京

今而後中華政治問題。乃瞭然解決矣。馮國璋之抵北京。誠關於中華時局之一幸事。前此猶慮馮

以國情騷擾。不允認大總統之職。然經國民黨派代表要馮勿離南京。與該黨協力組織南方政府。馮不表同情。今回北京。政治問題。可望從速解決。一切國務。新內閣已籌擬妥當。專待大總統命令施行。其亟需決定之一件事。則大總統受職時之儀節也。蓋將來正式大總統之地位。亦非馮莫屬云。

馮於抵北京之日。已就黎元洪敦請復職。黎堅辭不肯。則馮必爲大總統無疑矣。八月二日。北京政府以馮認大總統之職。通電各省。然受職大禮將以何日舉行。且於何地耶。前此袁總統在北京議院前。誓遵國憲。宣布受職。時議會集於南京。據理大總統宜就南京行受職禮。然袁以二月十六日兵變。不便離北京。黎總統則於袁世凱崩後。在議院前行受職禮。今日之事。意見紛歧。內閣人員謂大總統行受職禮。不拘何地。或在閣員前亦可。或謂宜於臨時召集議院前行受職禮。或謂但宜通電各省。稱馮國璋已認大總統職亦可。聞馮則主張於議會前行受職禮。此思想亦無甚關係云。

新總統第一要務。在如何鞏固秩序。維持治安。以奠民國之基礎。槃根錯節。正霜刀試刃之時也。馮向來素持無黨主義。方國內黨派紛爭政權傾軋之日。而馮并無所倚袒。可謂政界中之偉人矣。苟能堅持此主義。則其造福於中華也豈淺哉。且馮之性格與黎總統大異。黎是絕對質厚柔輒的人。馮乃絕對點慧剛果的人。須知今日之中華。黨爭劇烈。國勢分離。非質厚柔輒之人所能當此時局。必有馮總統之材略。曾得力於屢次變亂之經歷。乃克堪此負荷焉。况各省對於馮總統。本無一反對。所稱反對之數省。亦惟與段總理爲敵耳。馮既置身於兩造之外。則其調停之也。想亦不難。且馮固以調人擅長者也。

★ 南黨之計畫

孫逸仙爲南黨首領。現謀組織南中華政府。宣告獨立於廣東。此事之成與否。一視於兩廣巡閱使陸榮廷。觀陸亦不甚贊成。然無論如何。苟陸猶躊躇未決。則北京政府與之調停尙有轉圜之望。云且不得已。必須以兵力相見。南黨固無何等勢力。足與北京政府抗衡也。

南黨之中堅在國民黨。該黨今日對於外國。已無望其得一毫之庇助。此其失敗之一大原因也。上海及其他各報紙對於茲事之評論。已爲有目所共睹。該黨見情形日歸失敗。妄冀協約系外交團一臂之助。故云欲與德宣戰。且云該黨之政爭。亦係民權與強權對抗之舉。然彼黨遜飾之詞。天下耳目何可掩也。方中華議院開議與德宣戰。該黨首領孫逸仙曾致一書宣布意見。決不肯與德宣戰。而黨中諸重要人物。皆絕對不表同情。國民黨議員馬君武當議場極口抗議。

段祺瑞內閣之解職。亦由該黨無一毫愛國。內蓄私圖而不顧公利。百端構陷。以激成此內訌也。此一大政變。影響殆遍於全世界。而世界今日。則公理與強權交戰。人人望公理勝強權之日也。非我友者卽我敵。世界人類。誰不牢記斯言。彼國民黨乃懵然不知。相携入井則亦已矣。此後縱有要求於我協約系諸國。我亦何愚浪費心力以助我之敵者哉。

今而後在各國租界。決不許彼黨得復展半籌。爲彼黨涵容。彼黨既不之德。且毀蔑我。反背我。甚乃受德人之賂。將有不利於我焉。上海爲彼黨之機關。今失其立足之地。彼黨危亡。可立待矣。彼黨而稍有先幾之智。則宜降心俯首。屈服於公理之下。勿釀成戰禍。徒演一國破家亡之無理惡劇耳。北京政府於攻勢上已佔勝籌。將士用命。器械精良。財政問題。又將得列強借款。試問南黨果何禦之。

★ 段祺瑞之態度

凡稍有見識者。無論如何傾向。必先自問曰。此次黨爭是何所在。果獲幾許利益及爲國民關係乎。然試問民國所受之影響又何如也。段祺瑞於除張黨恢復共和。其有功於民國不爲不大矣。而國民黨公然與之爲敵。繫念民國者豈如是乎。彼黨只知段以兵力勝張。而不知段之勝張。乃以兵力衛公理。以今日之中華。彼黨謂能以空談救國耶。夫彼各省督軍如此其強梗。握政柄者可不藉兵力爲後盾耶。卽彼黨中人。亦有見乎此。故嘗極力謀得各省督軍之位置。且嘗百計運動馮國璋入黨。蓋由楊子江一帶之兵權。全在馮掌握也。

夫中華情勢。非兵力不爲功。彼黨既見及此。則得一最強有力之兵家。又最傾向共和之人物。如段祺瑞者。何不相與提攜。以貫徹其素所挾持之民主主義。至於張勳擁立清帝。傾倒共和。民主之基已危於累卵。得共和鉅子如段者。撥亂而反正之。則達民治之目的。絕專制之萌芽。正彼黨可乘之絕好機會。不此之務。而同室操戈。又何冥頑至此也。

段之言曰。予於一千九百十一年。贊成民主政體。迫清帝遜位。自後予對於予所贊成之政體。至所傾慕。張賊不軌。謀覆共和。復興帝制。予以義務所在。卽毅然討之。幸大功告成。民國得以再造。然欲奠民國之基。必國內有一民意機關以爲之主腦。此項機關。前固有之。然不免用權太濫。至釀成恢復帝制之舉。予欲得一民意機關。與現時政府協力圖治。務適合乎今日國民程度。如是則亞洲民國之基礎。乃不至動搖。而中國與遠東之和平。乃可長保也。

予以爲此項政策。誠今日救民國之不二法門。無論異己者如何阻力。予亦循斯軌而行之。不少

屈撓。蓋予已確定此項政策。真有利於我民之前途也。言行如是。而猶疑其不利於共和耶。惟國民黨私利之心太重。彼黨見進步黨助段有再造民國之功。恐戰勝之權利。盡爲所奪。而已無與焉。以私利故。遂不顧祖國。欲挈而投之內亂之旋渦中也。雖然是非利害固不待辨而明。一般國民。必不至盲從彼黨之無理取鬧也。行見彼黨不久自見消滅。中華民國。幸亦不再有流血之慘云。

